

南雷文定

冊二



南雷文定前集卷七

餘姚 黃宗羲 太沖撰

朱康流先生墓誌銘丁巳

漳海之學如武庫無所不備而尤邃於易曆三乘易卦爲二十六萬二千百四十四以授時配之交會閏積贏縮無不脗合詩與春秋遞爲爻象屯蒙而下兩濟而上二千一百二十五年之治亂燎若觀火其時及門者遍天下隨其質之所近止啼落草至於易曆諸子無復著坐之處相與探天根月窟者則康流先生一人而已康成善算馬融許以登樓季通精數文公謂之老友古人授受之嚴大抵不能泛及也先生博稽六藝各有論著其言象數不主邵子之說別爲先天後天八卦圖以爲諸儒之言易者詳於所變而不詳於所未嘗變變者象也未嘗變者太極也時惟適變道必會通不察其適變則微彰剛柔有拘墟之患不觀其會通則屈伸往來有臨歧之泣求諸物而格之反諸身而體之究其大要不越乎知幾精義二者而已其言小序觀亡詩六篇僅存首句則首句作

於未亡之前其下作於既亡之後明矣子由獨取初辭頗爲得之又謂鄭詩不特詞不淫聲亦不淫也詞正則聲正詞淫則聲淫非相離之物又謂作詩有賦比興用詩亦有賦比興射義天子以騶虞爲節樂官備也諸侯以貍首爲節樂會時也其指事也切其取義也直如作詩者之賦體是也大夫以采蘋爲節樂循法也士以采蘩爲節樂不失職也以婦女之事喻士大夫非比乎以蘋蘩蕓藻之菜筐筥鍤釜之器感大夫士明信之將非興乎辨古文尙書之非僞謂伏生之書如堯典皋謨洪範無逸何嘗不文從字順至於甘誓湯誓牧誓文侯之命詞旨清夷風格溫雅雜之二十五篇之中無以辨其爲今文爲古文也謂春秋闕文錯簡不特郭公夏五觀於日食之先時後時可知矣論樂者謂調以此始者必以此終首尾何聲卽屬何調先生言誠如是則宮調之中商多於宮可得仍爲宮商調之中宮多於商可得仍爲商乎蓋調也者韻也古人雅淡不爲繁聲慢詞大抵一句之終曳其音以永之而已先生之折衷諸家如此要不盡同於漳海漳海嘗謂先生曰康流沈靜淵鬱所目經史洞見一方苟覃精三數

年雖義文閒奧舍皆取其宮中何必窺人之室乎自漳海懸記先生之覃精者
近三十年又何以測其所至乎先生諱朝瑛字美之姓朱氏康流其別號也晚
又號壘菴海寧之花園里人曾祖侍御某祖紹皋父完初母查孺人登崇禎庚
辰進士第知旌德縣期年而以外艱歸旋遭喪亂遂不復仕門戶綢繆期功縈
繞先生屈其經世之業以支吾八口泊然不見喜愠之色酬對甚簡相索於經
術之內者惟張子待軒所著壘菴雜述金陵遊草行世五經略記文集皆藏於
家生於某年乙巳九月卒於某年庚戌三月年六十有六以弟之子翰思爲後
女三人查蕙沈研周煒其壻也孫二人協徵協紀孫女二人將葬於葑涇之原
翰思介吾友陸冰修求誌其墓余丙午歲十一月同冰修訪先生於家劇談徹
夜綿聯不休盡發所記五經讀之出入諸家如觀王會之圖計平生大觀在金
陵嘗入何元子署中討論五經至此而二耳踰年先生以各經略記首卷見寄
荏苒數年欲以一得之愚取證而先生不可作矣千年之役固所願也銘曰

六經之道昭如日星科舉之學力能亡經某題某說主媚有司變風變雅學詩

不知喪弔哭祭學禮所諱崩薨卒葬春秋不載演爲說書蒙存淺達棄置神理助語激聒所以儒者別開天地漢註唐疏宋語明義百年漳海破荒而出象數理學會歸於一壘菴老人入室弟子削筆洗硯俗儒心死漳海之學不得其傳葑涇之原留此一綫

徵君沈耕巖先生墓誌銘

有明之輔臣以奪情見劾者三人曰李賢張居正楊嗣昌然劾賢之羅一峯劾居正之趙吳艾沈鄒皆有祿位於朝唯劾嗣昌之沈耕巖則諸生也賢與居正當天下無事之日所失不過一身嗣昌當危急存亡之秋所關乃在社稷耕巖之言拯溺救焚縣記後言不爽累黍又非一峯諸公所言僅在一時也崇禎丙子復保舉之制應天巡撫張國維以耕巖應詔時中原流寇決裂特起嗣昌於苦塊倚以辦賊而嗣昌以熊文燦之招撫爲嘗試逍遙司馬堂中敗問日至粉飾徒工耕巖慨然國事至此朝端尙無一人可任者乃草綱常正而後可以正世風一疏謂金革奪情陋儒之曲說君子必不出此卽嗣昌迫於君命固應躬

歷戎行衽革荷戈而乃支吾旦夕安枕京師釀禍憚勞中懷規避將來誤國嗣昌之肉其足食乎臣竊謂樞臣籌國已誤一疏謂嗣昌既不能循先典乃援起復故事軍旅之寄一付文燦使其聲罪除凶三歲之議亦豈爲後以一十二萬方張之師不爲不武運二百八十餘萬咸集之餉不爲不充整旅以往何兇不摧卽使面縛輿櫬猶應宣布皇威而後昭上恩德以宥之詎有漫無翦治招之不來強而後可援賊之認帖以爲金石講盟結約猶同與國天下有不能殺人而能生人者乎有授柄於敵而可懾敵者乎臣不知其所終矣通政司張紹先以疏字逾額存案不上耕巖上書通政言無使獲罪執事幸甚紹先始請上裁嗣昌亦惶恐待罪請進劾己之章有旨這本旣違式卿不必更請封進耕巖乃隲括兩疏以就格上之留中不報黃漳海嘆曰此何等事在朝者不言而草野言之乎吾輩真愧死矣臺省何楷錢增林蘭友詞林劉同升趙士春相繼劾嗣昌最後而漳海有廷辨之事則皆發端于耕巖也向若耕巖之說行斯時易置嗣昌文燦流寇之禍豈至若是哉故識者以爲此番保舉得耕巖一人可以謂

之不虛矣耕巖姓沈氏諱壽民字眉生別號耕巖世爲宣州人曾祖寵官至參政學者所稱古林先生是也祖懋敬蒲州丞封德慶知州叔祖懋學翰林修撰父有恆太學生耕巖孤峭不妄言笑爲文深入理窟而出之清真江右艾千子至宛上評許在盛名之上人駭其言而卒莫之能易焉故其選時文耕巖之文多入文定不敢輕置於文待一時聲名之盛吳中二張與江上二沈相配二張謂天如受先二沈謂崑銅耕巖不以各位相甲乙也上書報罷不復歷意經生之業與周鹿溪掩關茅曲俱理佐王之學無何而黨禍作阮大鍼之在留都也以新聲高會招來天下之士利天下有事行其裨闔耕巖劾楊疏尾有大鍼妄畫條陳鼓煽豐芑於是顧杲吳應箕推耕巖之意出南都防亂揭合天下名士以攻之大鍼恨甚以爲主之者鹿溪也及大鍼得志曲殺鹿溪按揭中姓氏次第欲誅之而以耕巖爲首余亦與焉且聞溧陽亡命投止耕巖矯詔將下溧陽返北耕巖遂變姓名入金華山中南都亡而事解耕巖遂不返故園東遷西徙入山惟恐不深瓶粟旣罄採藜藿以續食有知而餉之悉行謝絕曰士不窮無

以見義不奇窮無以明操郡守朱元錫曾寄十金耕巖意不欲受度置壁中三年塵甑未嘗一發視也溧陽既相將特疏薦之端使寓書耕巖不開封對使焚之溧陽意猶未已耕巖寄書謂之曰龔勝謝枋得其智非不若皋羽所南也而卒以隕厥軀者緣多此物色故耳故凡今之欲徵僕薦僕者直欲死僕者也溧陽嘆曰先生所謂名可聞身不可得見者也乙未始返故廬松菊無存田園半割或請直諸曰身既隱矣焉用直之然避人愈深其名愈著當事或邀之半道則望望而去比之元亮人以爲隘焉乙卯五月屬疾門人吳肅公侍耕巖命其載筆曰以此心還天地以此身還父母以此學還孔孟語畢而卒是月之三日也年六十九遺集若干卷閑道錄若干卷配徐孺人先十九年卒子六人洙燮榆鑿埏逢將以某年葬於某所耕巖重然諾一切皆有至性友人周梅骨死海外其子幼耕巖渡海葬其骨鹿溪之歿也家業零落藐諸孤爲逋負所逼耕巖鬻田以償之不足貸諸人又不足屬諸門人鹿溪始有完卵故自言才疎意廣甲申以前貸金至六百以上皆急朋友之急也余少遭患難輟業者久之庚午

邂逅耕巖於南中偃偃之力何日忘之癸酉耕巖訪余至姚江戊寅余訪耕巖至宛上而不遇改革以後兩番寄詩亦不知其達不達也甲辰在姑蘇與鄒文江約將以秋冬之際同訪耕巖日復一日文江不來而老母年登九旬余遂不可遠行矣茫茫禹跡余之不可以告人者欲向耕巖盡之豈料竟無相見之期耶乙卯八月接耕巖永訣一書乃是年四月二十日所寄去易簣十有三日耳以數年不通尺一忽得之易簣之際不可謂非吾兩人之冥契也先生之子逢不遠千里求誌幽石余泫然和淚而銘曰

吳門之卒卽攻王氏之人西臺之哭卽劾似道之臣嗚呼耕巖千載同論

陳定生先生墓誌銘

甚哉小人之愚也小人之仇君子必指之爲朋黨大書深刻列其姓名將使後世之人同心疾之也然蔡京立元祐姦黨碑而三百九人者後人各爲之列傳韓侂胄立慶曆黨人碑而劉後溪遂以慶曆黨人之名名游監簿之墓黨人之家亦各以其名名其門第原小人心固謂被是名者不勝其辱矣孰知適以

榮之耶天啓闕逆奄竊國是時有百官圖邪黨錄天鑒錄同志錄點將錄依之以盡殺朝廷之士所謂東林黨人也其闕侍從之臣楊左以外宜與少保陳公爲之魁崇禎末阮大鍼作蝗蝻錄以復社名士填之謂是東林後勁欲依之以盡殺天下之清流其闕定生先生爲之魁按元祐黨人唯司馬光司馬康范純仁范正平呂公著呂希仁父子名在黨籍而先生之父子實似之訖今四十年貞元朝士無多劫塵冷落天子開明史局根括天下藏書於是東林黨籍稍稍復出而先生父子皎然與日月爭光可不謂之榮耶先生諱貞慧字定生陳氏爲止齋之後由永嘉徙宜興遂爲望族曾祖諱憲章祖諱一經皆贈左都御史父諱于廷仕至左都御史贈少保母張氏贈夫人生母湯孺人少保四子長貞貽有文名而天次貞裕天啓甲子舉人次貞達戶部主事左遷順天知事國變死節季卽先生也先生幼而奇傑少保喪其才子居恆鬱鬱不樂顧先生在側曰賴有此耳弱冠補弟子員廩於學宮侍少保宦遊南北凡朝政之缺失君子小人之消長口談筆記皆出經生聞見之外居家孝謹庭闈之內無疾言遽色

念長兄之才恐其遂至淪沒因梓行其書少保沒同邑故相以生前睚眦修怨

其孤有取子毀室之虞先生搢定良苦故相知其不可以力屈也好言慰藉之

先生落落如故時周仲馭沈眉生讀書句曲先生與吳次尾讀書毫村皆好佐

王之學獨持清議裁量公卿天下望之如鑠鄒出匣當是時烏程執政八年以

禁錮東林爲事淄川韓城承有衣鉢東林雖時出彈射有勝有不勝而終不能

覆妖鳥之巢以得志于時漳海在獄利害尤急三吳君子閒出奇計謂不如援

彼黨一人以爲兩家騎郵庶放東林出一頭地僉諧故相而故相所最暱者爲

阮大鍼大鍼亦從吳中咕囁耳語曰苟使大鍼得改事諸君所謂生死而骨肉

也溺灰陽焰置酒高會南中之士入其牢籠者強半吳中諸公恐仲馭未之許

也邀之半道會于虎邱天如來之以謀告仲馭持論不下

此仲馭親爲余言會今人恐無知者

眉生保舉入京劾楊武陵并及大鍼妄畫條陳鼓煽豐芭大鍼始沮喪先生與

次尾因草留都防亂揭顧子方曰大鍼者吾祖之罪人也吾當爲揭首其次則

天啓忠臣之家故余與左魏繼之一時勝流咸列其姓名大鍼杜門咋舌欲死

故相出山大鉞猶不忘援手故相曰南中議論與吳中駁異未便可動大鉞曰廢籍馬士英某之化身也其可乎故相諾之而去崇禎己卯金陵解試先生次尾舉國門廣業之社大略揭中人也崑山張爾公歸德侯朝宗宛上梅朗三蕪湖沈崑銅如皋冒辟疆及余數人無日不連輿接席酒酣耳熱多咀嚼大鉞以爲笑樂士英定策大鉞暴起國狗之瘼無不噬也遂廣揭中姓名以造蝗蝻錄思一網殺之仲馭下獄死眉生次尾崑銅皆亡命余與子方從徐署丞疏逮問而先生亦爲校尉縛至鎮撫事雖解已濱十死矣若是乎宏光南渡止結得留都防亂揭一案也國亡之後殘山剩水無不戚戚可念埋身土室不入城市者十餘年先生卽甚貧乎而遺民故老時時猶向陽羨山中一問生死流連痛飲驚離弔往恍然如月泉吟社也所著有皇明語林山陽錄雪岑集交遊錄秋園雜佩入大家文選若干卷生于萬曆甲辰十二月九日卒于順治丙申五月十九日年五十三配湯孺人左都御史湯公北京女子男五人長維崧翰林院檢討次維嶠庠生次維岳太學生次宗石黎城縣丞次維岡女二人吳璟吳全昌

其壻也孫男四人履端履慶伊瀍孫女十一人維崧以先生卒後六年十一月葬于亳村新阡又後十有八年從京師函幣寄余求銘幽石維崧以博學宏儒徵入史局天下方藉以發潛德之幽光而况于其先公乎乃不憚數千里之遠下訊草野其亦司馬子長徵于夏無且之意歟銘曰

汪魏美先生墓誌銘

汪魏美之卒徐蘭生屬余誌銘曰吾當先之以狀也荏苒十六年狀不可得頃見蘭生十哀詩略具魏美事實又見金道隱汪孝廉傳因採兩家之言而誌之以覆蘭生使授其子魏美諱颯新安人徙於錢塘祖父某父某妣某氏魏美孤貧力學舉崇禎己卯鄉薦乙酉兵亂奉母入天台海上師起羣盜滿山始返錢塘僑寓北郭室如懸罄處之愴如當是時湖上有三高士之名皆孝廉之不起公車者魏美其一焉當事亦甚重之監司盧公尤下士一日值魏美於僧舍問汪孝廉何在魏美應曰適在此今已去矣盧公然之不知應者之卽魏美也盧

公遣人通殷勤於三高士者置酒湖船以世外之禮相見其二人幅巾抗禮盧公相得甚歡唯魏美不至爲恨事已知其在孤山放船就之魏美終排牆遁去魏美不入城市不設伴侶始在孤山尋遷大慈菴又遷寶石院匡牀布被之外殘書數卷鎖門而出或返或不返莫可蹤跡相遇好友飲酒一斗不醉氣象蕭灑塵事了不關懷然夜觀乾象晝習壬遁知其耿耿者猶未下也余丁酉遇之孤山頗講龍溪調息之法各賦三詩契勘戊戌三宜孟設供同坐葛仙祠己亥二月望笑魯菴中坐月至三更是夜寒甚菴中止有一被余與魏美兩背相摩得少煖氣明日余入雲居訪仁菴魏美矢不入城至清波門別去從此不復相值有傳其在洞庭山者乙巳七月三十日終於寶石僧舍年四十八臨歿悉舉書卷焚之詩文無一存者妻某氏子蓮嘗思宋之遺民謝翱吳思齊方鳳翼開鄭思肖爲最著方吳皆有家室翱亦晚娶劉氏開至貧畫馬有子同居唯思肖孑然一身乞食僧廚魏美妻死不更娶有子托于弟行事往往與思肖相類遺民之中又爲其所甚難者道隱言盡大地人未有死者七趣三世如旋火輪皆

熾然而生求不生者了不可得君卽不壽何患不仙要以所苦不得無身則埃君仙後尙當與予求必死之道此言魏美調息長生之非也道隱之所謂熾然而生者卽輪迴之說所謂必死之道卽安身立命于死了燒了之說也而余之論生死正是相反天地生氣流行人以富貴利達愛惡攻取之心熾然而死之輪迴顛倒死氣所成魏美之志如食金剛終竟不銷此不銷者不可得死忠孝至性與天地無窮寧向尸居餘氣同受輪迴乎道隱視此與萬起萬滅之交感一類斷絕其種子則乾坤或幾乎息矣銘曰

學問之道在乎立志凡可奪者皆原于僞桑海之交士多標致擊竹西臺沈函古寺年書甲子手持應器物換星移不堪憔悴水落石出風節委地侃侃魏美之死靡二何意百鳥乃見孤鷺死而不亡惟此生氣

王仲撝墓表 己酉

君諱正中字仲撝直隸保定人登丁丑進士第未謁選索游於高唐州會大兵南下轉運銀杠亦避人高唐大兵圍高唐州守以爲銀杠且晚是敵物不如以

此鬻城免士女屠戮流離之苦立要約使與議者押字仲撝與焉事平轉運者上失物狀於是逮高唐守及仲撝論死繫獄數年刑科給事中李靖理而出之降補揚州照磨移知長興縣國變後失官避地於紹興截江時以兵部職方司主事攝餘姚縣事是時公私赤立剽奪爲豪市魁里正朝得劄付一紙暮便入民舍根括金帛係僦丁壯交錯道路郡縣不敢向問爲某營也仲撝設兵彈壓各營取餉必使經由於縣品覈資產裁量以應之非是則爲盜賊總兵陳梧敗於樵李渡海至姚鹵掠鄉聚仲撝遣兵擊之鄉聚相犄角殺梧行□忌仲撝者以此聲討某謂梧之見殺犯衆惡也不當罪正中上疏救之乃止張國柱劫定海王總兵縱兵大掠列船江上入城牢搜者二千人仲撝攔止所圍大姓數家從仲撝丐命仲撝爲之消息國柱終不得志而去田仰荆本徹先後過姚舟楫蔽江皆帖帖俯首不驚雞犬蓋人民之恃仲撝一時如決水之堤焉陞監察御史尙寶寺卿朱大定太僕寺卿陳潛夫兵部主事吳乃武皆從浙西來受約束壇山烽火達於武林仲撝短小精悍喜於任事雖以武寧羣從得不爲列營所

撓亦其智計有以副之也好讀實用之書不事文彩其言星象則從閩人柯仲
爛於獄中受之行□初建進□所著監國魯元年大統曆丁亥訪某山中某時
註授時曆仲撓受之而去壬辰來訪授以律呂辛丑來訪授以壬遁仲撓皆能
有所發明自某好象數之學其始學之也無從叩問心火上炎頭目爲腫及學
成而無所用屠龍之技不待問而與之言亦無有能聽者矣蹉然之音僅一仲
撓又以饑火驅走南北丁未二月遇之越城爲言年來益困將於鑿湖濱佃田
五畝佐以醫卜續食耳其年八月十九日仲撓卒年六十九權厝於山陰之陳
常堰所著周易註若干卷律書詳註一卷子一人三捷嗟乎某與仲撓交二十
餘年與之同事而無成與之共學而未畢仲撓生時已無人知仲撓者向後數
年復更何如此紙不滅亦知稽山塊土曾塞黃河也

談孺木墓表丁巳

君談氏名遷字孺木海寧縣人初爲諸生不屑場屋之僻固狹陋而好觀古今
之治亂其尤所注心者在明朝之典故以爲史之所憑者實錄耳實錄見其表

其在裏者已不可見况革除之事楊文貞未免失實泰陵之盛焦泌陽又多醜
正神熹之載筆者皆宦逆奄之舍人至於思陵十七年之憂勤惕勵而太史遯
荒皇歲烈焰國滅而史亦隨滅普天心痛於是汰十五朝之實錄正其是非訪
崇禎十七年之邸報補其缺文成書名曰國權當是時人士身經喪亂多欲追
敘緣因以顯來世而見聞窄狹無所憑藉聞君之有是書也思欲竊之以爲己
有君家徒四壁立不見可欲者夜有盜入其室盡發藏稿以去君喟然曰吾手
尙在寧遂已乎從嘉善錢相國借書復成之陽城張太宰膠州高相國皆以君
爲奇士折節下之其在南都欲以史館處君不果亡何太宰相國相繼野死君
亦棄諸生北走昌平哭思陵西走陽城欲哭太宰未至而卒丙申歲冬十一月
也蓋君於君臣朋友之閒實有至性故其著書亦非徒爲盜名之祕經而已余
觀當世不論何人皆好言作史豈真有三長足掩前哲亦不過此因彼襲攘袂
公行苟書足以記名姓輒不難辦權而論之史之體有三年經而人與事緯之
者編年也以人經之者列傳也以事經之者紀事也其閒自有次第編年之法

春秋以來未之有改也有編年而後有列傳故本紀以爲列傳之綱有編年而後有紀事故紀事爲通鑒之目奈何今之作者矢口遷固而不屑於悅宏夫作者無乘傳之求州郡鮮上計之集不能通知一代盛衰之始終徒據殘書數本諛墓單辭便思抑揚人物是猶兩造不備而定爰書也以余所見近日之爲□者其人皆無與乎文章之事而公然長篇累牘行世藏家輒欲與五經方駕三志競爽豈以後世都可欺乎君乃按實編年不銜文彩未嘗以作者自居異日有正明世之事者知在此而不在彼也君之子祺求余表墓余美無溢辭亦史法也

張元祐先生墓誌銘

海昌有窮經之士二人曰朱康流張元祐短簷破屋皆拌數十年之力曉風夜雨沈冥其中兩人每相攻難故其成書彼此援引張其說以余所見兩先生詩易言之康流但究旨要諸家聽其散殊不爲收拾元祐錯綜積玉忘懷彼我康流於易研尋圖象盡拔趙幟元祐宗主王程以玩辭爲本至于指歸日用不

離當下因孔子而求文周因文周而求義易則兩家一也康流於詩美刺如霜
雪元祐纏綿悽愴有流離世故之感至取序首一語推原詩前之意則兩家一
也兩人皆遭喪亂而皆能以經術顯則人力信乎可與天爭矣先生諱次仲字
元祐別號待軒曲江之裔七傳至光翰光翰子用忠事吳越王屢立戰功歸老
海寧之棗林河大德末仲山爲其邑許村場鹽課司子思賢徙居城東其族始
大祖某父某先生七歲就外傳遂授易八歲母密孺人疾病割股而愈十八歲
爲諸生郡邑聞其事旌表之旣而撫按欲具奏先生辭曰童幼無知思之猶有
餘愧可復以此沽名耶父與亭戶訟直指聽之先生偕父坐獄於庭父不勝直
指曰何與諸生事先生曰父子至情非明府之法可移直指視其瞻對慷慨爲
之罷訟舉天啓辛酉浙江鄉薦虞山處之若畏友當是時坊社正感先生所選
擬古清裁刊落浮華多發天然爲世所貴韓求仲周介生選家巨擘亦以爲不
如然先生矜貴自喜未嘗標榜以樹聲名一時名流視爲別調先生喜親前輩
得其一言終身奉爲藥石許淮安同生初見先生語之曰爲官自居鄉始子其

慎諸先生由此一生無竿牘郡邑之事章給事格菴邂逅先生謂曰近名事慎勿爲之選政其一也先生憬然從此斷手先生楷模前輩風範其與人言亦不肯作一熟軟語同學以御史行部先生送之間今日從何處做起御史曰吾安能爲乎惟搪塞過去耳先生怫然曰天下事皆搪塞二字壞之不意足下亦有是言榮兩士大夫皆集先生倡言諸公亦知之乎一月以來無日不雲無日不雷而雨終不至上天之意視斯民之困苦若不得不雨視士大夫之驕奢若不可雨其徘徊于兩歧之閒乎聞者愕然先生雖苦力著書然未嘗忘世學雙劍學長鎗皆精其技久之棄去先世充亭戶共業者苦於官課先生置義田一百七十畝以除其害邑令以清丁致擾而難於驟改先生曰明府志在利民不利則己非無執持也令然之房師吳以時上疏請定胥吏稅役以寬民賦先生論其不可惡胥吏而稅之亦抑末之意也既稅其役則胥吏有辭於偷矣邑故有黃生絹役前令革之奸民謀復以便乾沒先生言於石守乃已先生以入利害爲身苦樂故興利除害之際必毅然當之不讓然以五十餘年老孝廉八科下

第不當纖芥之任天下搖搖如覆舟袖手旁觀歎歎嘆息其設施之可見者鄉邦一二細事耳豈不可惜哉余嘗疑世風浮薄狂子僂民羣起糞掃六經溢言曼辭而外豈有巖穴之士爲當世所不指名者而先生孤燈款對意通響象別有寒餓相與綢繆沈繼震字子起武林人矮几折足俯首以注六經婦抱女孩徙倚四壁寒風凜然不知世閱富貴爲何物先生云孤苦四十餘年天心來復賜以子起又云世人皆飽死而子起獨餓死子起卽捧此枵腹可見列聖于地下若輩飽死更何益胡廷試字玉呂餘姚人嘗爲弇州塾師崛強不肯伏弇州臨卒欲聞炮聲散其鬱結終夜不徹乃瞑一生知己先生一人而已然則世非無其人能知其人之人少也先生旣知其人矣得無以死後餘力引而齊之使子起玉呂亦從先生而傳乎余故序之先生誌後猶昔葉水心之例也先生以康熙丙辰四月某日卒年八十八娶徐氏子三人昂貢生晟庠生景國學生皆先卒孫一人詎諸生曾孫三人貞觀正觀永觀皆余兒百家之門人也卒後幾年葬於某原詎鑿墓石再拜求銘銘曰

我於先生把臂語溪高冠岌岌長佩陸離又後十年訪于海涯一樽相對祈死
爲辭曾不十日梟復隨之維此十日留以待義宋之遺民經之大師書帶環墳
千載如斯

李杲堂先生墓誌銘

文章不特與時高下亦有地氣限之明越兩郡其地密邇同一風氣明初楊鐵

崖戴九靈

戴寓明州

爲文學宗老唐丹崖謝元功趙謙比肩而作宋無逸鄭千子皆

楊門弟子其時師友講習炳然阡陌一時號爲極盛凌夷正嘉而後競起邪宗

孫文恪輸心於槐野余君房辦香於子威赤水月峯疎密不同而文勝理消謂

論語爲孔子之文選耳苟肆狂狷無所取裁陳後岡徐文長雖異趨時風衆勢

無以發伏蠶之雄氣卽如陽明之文韓歐不足多者而謂文與道二溝而出諸

文苑是故兩郡作者敝精神乎蹇淺由來矣先生初亦不避輕華其後每得余

作往往嗟悵因相與校覆雅鄭洗其偷薄之說推原道藝之一先生不以余空

隙一介之知而忽之也自此轉手大放厥辭同里稍稍響應翻然於不迫於是

東浙始得古文正路而由之四境之內凡有事於文章者非先生無以訖意轉相求請充物昔席方外詩人得先生一言便可坐高聲價款門雲水疲於應接里中有鑿湖社做場屋之例糊名易書以先生爲主考甲乙樓上少長畢集樓下候之一聯被賞門士臚傳其人拊掌大喜如加十賚明州自東沙好文下士主張藝林士無不捧珠槃而至者然其氣力足以鼓動不盡關著作先生以布衣幾與之頽頽而肺疾爲梗流放家門海內知之者尙未滿其量也先生諱文胤字鄴嗣今以字行別號杲堂宋忠襄李顯忠之後世居清澗忠襄曾孫守真始遷於鄞其下六世是爲先生之高祖循義嘉靖癸未進士御史出守衡州曾祖生威舉於鄉官鳳陽府推官其孫卽守貴州之巡撫櫻也因贈兵部尙書祖德升永平衛經歷父櫚崇禎丁丑進士禮部儀制司主事先生風骨不恆年十二三能詩卽有秀句十六爲諸生侍儀部官嶺外通人張孟奇深所歎異歸而時各方起直兵革之際睚眦觸死儀部下省獄先生亦驅至定海縛馬廄中七十日事得解儀部之喪從省至放聲一哭遂絕意人世穿竄草石與失職之徒

萬悔菴徐霜皋高辰四諸君緣情綺靡音調淒涼先生雖不逃禪而酒痕墨蹟多在僧寮野廟木陳悟留山曉天岳皆結忘年之契四方勝流之至甬上者先生卽匿迹甚深亦必停車披帷詩酒流連否則似垂橐而歸矣先生愍郡中文獻零落做遺山中州集例以詩爲經以傳爲緯集甬上耆舊詩搜尋殘帙心力俱枯其布衣孤賤尤所惋結宛轉屬人則頓首丁寧使其感動奪之鼠塵績筐錫笛之下以發其光彩若片紙未出先生自比長吉之中表凜乎有不祥之懼焉書成立詩人之位祀以少牢聞者爲之軒渠張司馬死故國先生葬其兩世楊侍御文瓚亦以連染死淺土十棺語溪曹廣葬之先生爲歌詩記其事凡見聞所及美事先生不肯讓人先生尤長於麗語使當詞頭之任真足華國而以廟堂金石散爲竹枝禪頌之音豈不可惜然宋景濂謂謝翱方鳳吳思齊皆工詩客浦陽浦陽之詩爲之一變向若先生草率青雲苟非勞謙卮□亦豈能一變甬東之風氣如三子哉生于天啓壬戌四月二日卒于康熙庚申十一月八日年五十九娶某氏子一人嗽女六人長適萬斯備次適邱瑜次適沈紹雯次

適林獬錦餘未行噉將以某年月日葬先生於某原與斯備來速銘銘曰
文之美惡視道合離文以載道猶爲二之聚之以學經史子集行之以法章句
呼吸無情之辭外強中乾其神不傳優孟衣冠五者不備不可爲文野人議璧
稱好隨羣此言余發以告先生先生曰然但苦三彭匠石郢人霜鐘應律先生
之死吾無爲質

南雷文定前集卷七

南雷文定前集卷八

餘姚 黃宗羲 太沖撰

萬充宗墓誌銘

五經之學以余之固陋所見傳註詩書春秋皆數十家三禮頗少儀禮周禮十餘家禮記自衛湜以外亦十餘家周易百餘家可謂多矣其聞而未見者尙千家有餘如是則後儒於經學可無容復議矣然詩之小序書之今古文三傳之義例至今尙無定說易以象數讖緯晦之爲後漢至王弼而稍霽又以老氏之浮誕魏伯陽陳搏之卦氣晦之至伊川而欲明又復以康節之圖書先後天晦之禮經之大者爲郊社禘祫喪服宗法官制言人人殊莫知適從士生千載之下不能會衆以合一由谷而之川川以達於海猶可謂之窮經乎自科舉之學興以一先生之言爲標準毫秒摘抉於其所不必疑者而疑之而大經大法反置之而不道童習自守等於面牆聖經興廢上關天運然由今之道不可不謂之廢也此吾於萬充宗之死能不慟乎充宗諱斯大吾友履安先生之第六子

也其家世詳余先生誌中充宗生逢喪亂不爲科舉之學湛思諸經以爲非通諸經不能通一經非悟傳註之失則不能通經非以經釋經則亦無由悟傳註之失何謂通諸經以通一經經文錯互有此略而彼詳者有此同而彼異者因詳以求其略因異以求其同學者所當致思者也何謂悟傳註之失學者入傳註之重圍其於經也無庸致思經既不思則傳註無失矣若之何而悟之何謂以經解經世之信傳註者過於信經試拈二節爲例八卦之方位載於經矣以康節離南坎北之臆說反有致疑於經者平王之孫齊侯之子證諸春秋一在魯莊公元年一在十一年皆書王姬歸於齊周莊王爲平王之孫則王姬當是其姊妹非襄公則威公也毛公以爲武王女文王孫所謂平王爲平正之王齊侯爲齊一之侯非附會乎如此者層見疊出充宗會通各經證墜緝缺聚訟之議渙然冰泮奉正朔以批閨位百注遂無堅城而老生猶欲以一卷之見申其後息之難宜乎如腐朽之受利刃也所爲書曰學禮質疑二卷周官辨非二卷儀禮商二卷禮記偶箋三卷初輯春秋二百四十卷燼於大火復輯絕筆於昭

公丁災甲陽艸各一卷其間說經者居多萬氏家譜十卷噫多矣哉學不患不博患不能精充宗之經學由博以致精信矣其可傳也然每觀古人著書必有大儒爲之流別而後傳遠如蔡元定諸書朱子言造化微妙唯深於理者能識之吾與季通言而不厭也故元定之書人皆敬信陳澔之禮記集說陳櫟之禮記解吳艸廬曰二陳君之說禮無可疵矣故後皆列之學宮自蕺山先師夢奠之後大儒不作世莫之宗牆屋放言小智大黠相煽以自高但有講章而無經術充宗之學誰爲流別余雖嘆賞而人亦莫之信也充宗爲人剛毅見有不可者義形於色其嗜義若饑渴張蒼木死國難棄骨荒郊充宗葬之南屏使余誌之春秋野祭蓋不異西臺之哭焉父友陸文虎甬中所稱陸萬是也文虎無後兩世之喪皆在淺土充宗葬其六棺凡所爲皆類此不以力絀隻輪而自阻也崇禎癸酉六月六日其生也康熙癸亥七月二十六日其卒也娶陸氏子一人諸生經能世其學充宗之卒余許銘其墓以鄭禹梅之跛翁傳盡其大指故閣筆者久之而經累請不已又二年始克爲之銘曰

三代之始懸隔千祀制度文為三傳三禮牛毛繭絲精微在此釋者以意或得
或否躡訛踵陋割裂經旨侃侃充宗尋源極委會盟征伐冠昏喪紀如捧珠槃
如承明水如服元端不謂故紙三尺短碑西溪之址書帶環之不生葛藟

陸周明墓誌銘 甲辰

司馬遷傳游俠以鄉曲之俠與獨行之儒比量而賢夫俠者以布衣之俠與卿
相之俠比量而難夫布衣然時異勢殊乃有儒者抱咫尺之義其所行不得不
出游俠之途既無有土卿相之富厚其所任非復閭巷布衣之事豈不尤賢而
尤難哉十年以前亦嘗從事於此心枯力竭不勝利害之糾纏逃之深山以避
相尋之急此事遂止其時周明與其客以十數見過皆四方知名之士余閱至
其城西田舍復壁柳車雜賓死友咄嗟食辦余既自屏周明亦不相聞問然頗
聞其喜事益甚江湖多傳周明姓名以為異人嗟乎周明亦何以異於人哉華
屋甫田婚嫁有無人情等爾亦唯是胸中耿耿者未易下膺人見其踵側焦原
手搏彫虎遂以為異雖然周明一布衣諸生又何所關天下事而慷慨經營使

人以俠稱是乃所以爲異也周明姓陸氏名宇燝鄞縣人也祖某父世科大理寺卿母某氏配周氏崔氏子經異經周壻萬斯大少與錢司馬讀書忼慨有大志司馬江上之事周明實左右之祥與航海其諸臣風帆浪楫棲遲金鰲牡蠣之閒非內主之力則亦莫之能安也癸卯歲周明爲降卒所誣捕入省獄獄具周明無所註誤脫械出門未至寓而卒周明以好事盡其家產室中所有唯草薦敗絮及故書數百卷計聞家中整頓其室得布囊於亂書之下發之則人頭也其弟春明識其面目捧之而泣曰此故少司馬篤菴王公頭也初司馬兵敗梟頭於甬之城闕周明思收葬之每徘徊其下一日見暗中有叩首而去者跡之走入破屋周明曰子何人其人曰吾漁人也周明曰子必有異無爲吾隱其人曰余毛明山曾以卒伍事司馬今不勝故主之感耳周明相與流涕而詣汪子雲計所以收其頭者江子雲者故與周明讀書錢公之將也失勢家居會中秋競渡遊人雜沓子雲紅笠握刀從十餘人登城遨戲至梟頭所問守卒曰孰戴此頭也者卒以司馬對子雲佯怒曰嘻吾怨家也亦有是日乎拔刀擊之繩

斷墮地周明明山已豫立城下方是時龍舟噪甚人無回面易視者周明以身蔽明山拾頭雜儻人而去周明得頭祀之書室蓋十二年矣而家人無知者至是而春明始瘞之昔李固之死汝南郭亮左提章鉞右乘鐵鑕詣闕上書乞收其屍南陽董班亦往哭固殉尸不肯去爨布奏事彭越頭下祠而哭之彼皆門生故吏故冒死而不顧周明之於司馬非有是也一念憐其忠義遂不惜扞當世之文罔所謂尤賢尤難者不更在是乎初周明讀書時有弟子訟其師師不得直周明詣文廟伐鼓慟哭卒直其師而後止昔震川敘唐欽堯爭同舍生之獄以爲生兩漢時卽此可以顯名當世在周明視之尋常瑣節耳獨恨不得司馬遷以拾之余因萬斯大而論次僅以答周明曩者之一顧也銘曰

或駭其奇或嘆其拙茫茫宇宙腐儒蜉蝣結

進士心友張君墓誌銘

心友張君沒於京師其友無不哀之哀其有才而業未就也有志而學未遂也慨自時風衆勢趨於科舉一途苟非卓立千古之士一第進士便意滿志得以

爲讀書之事畢矣故流俗之論雖穿穴經傳形灰心死至於老盡者苟不與策名皆謂之無成豈知場屋之外復大有事古今事物錯落高下不以涯量帝王之所經營聖賢之所授受下而緣情綺靡之功俱屬吾人分內學者窮年矻矻彷彿其涯涘而不可得總逸才命世抗志思古道之未通吾夫子所謂苗而不秀秀而不實在此而不在彼也君天姿朗秀率性聰達年二十四舉於鄉明年登進士第縱橫指取無不如意流俗莫不交口羨之爲人得如君則亦已矣而君獨歆然不自以爲足將暫息乎其已學者而勤乎其未學者於是親師取友里中有講經會君帖帖坐諸生下恐不卒得聞同邑范氏多藏書余偕同學借抄日計君所手抄過於傭書者君不特抄之而且發之爲詩無僻固狹陋之習使由是而之焉則且淳之爲道德流之爲文章溥之爲事業皆未可知未幾而君卒矣乃僅僅以詩見之於友朋閒是其才可惜而志可哀也故論君者不在君之所就於其所未就者君自此遠矣君諱士塤字心友別號雪汀張氏顯於宋宰相知白無子以兄子子思爲後仕至尙書工部侍郎後有籲者自滄州徙

鄞籲孫用明遷雲龍溪明永樂閒用明之後允肅贅城西青石橋余氏因家焉
允肅生甯甯生泮弘治辛酉鄉進士知豐縣改汀州府學教授聚徒講學稱爲
味芹先生味芹生仕仕生國紀國紀生一相一相生遐勳字振寰治產積居與
時逐遂至富厚君其仲子也君應授推官以汰冗員改知縣值銓選壅滯又連
丁內外艱需次於家者十餘載讀書之外好古書畫法帖與其友陳夔獻陳介
眉范國雯王文三鄭禹梅之輩相砥礪於古昔乙卯始入京候補行人丙辰卒
於寓舍康熙十五年某月某日也距生崇禎十三年庚辰某月某日年三十七
蓋未沾一命而卒士人白首窮經得貢於天子者固難貢於天子矣得登進士
第尤難之難也旣第進士則解褐除官直易易耳君何易其所難而難其所易
鄉黨親戚以爲君之不幸君子固未嘗以此置欣戚於其閒也娶陳氏卽夔獻
之女弟子二人錫璜縣學生錫璫太學生君將北上預營葬地於吳家斗繪圖
賦詩以爲達豈知其風流將盡志一之動氣乎錫璜錫璫以國雯之狀來請銘
余不得辭銘曰

蹙蹙章句錮人性命視一科名以爲究竟正如海師針經錯亂妄認魚背指曰
洲岸所以古人舉頭天外些少得志曾不芥蒂此意無窮海怒鵬騫希賢希聖
以至希天吁嗟雲汀風雲呼翕如此之人曾不四十

王征南墓誌銘 己酉

少林以拳勇名天下然主於搏人人亦得以乘之有所謂內家者以靜制動犯
者應手卽仆故別少林爲外家蓋起於宋之張三峯三峯爲武當丹士徽宗召
之道梗不得進夜夢元帝授之拳法厥明以單丁殺賊百餘三峯之術百年以
後流傳於陝西而王宗爲最著温州陳州同從王宗受之以此教其鄉人由是
流傳於温州嘉靖閒張松溪爲最著松溪之徒三四人而四明葉繼美近泉爲
之魁由是流傳於四明四明得近泉之傳者爲吳崑山周雲泉單思南陳貞石
孫繼槎皆各有授受崑山傳李天目徐岱岳天目傳余波仲吳七郎陳茂宏雲
泉傳盧紹岐貞石傳董扶輿夏枝溪繼槎傳柴元明姚石門僧耳僧尾而思南
之傳則爲王征南思南從征關白歸老於家以其術教授然精微所在則亦深

自秘惜掩關而理學子皆不得見征南從樓上穴板窺之得梗概思南子不肖思南自傷身後莫之經紀征南聞之以銀卮數器奉爲美饌之資思南感其意始盡以不傳者傳之征南爲人機警得傳之後絕不露圭角非遇甚困則不發嘗夜出偵事爲守兵所獲反接廊柱數十人轟飲守之征南拾碎磁偷割其縛探懷中銀望空而擲數十人方爭攫征南遂免出數十人追之皆踣地匍匐不能起行數里迷道田闌守望者又以爲賊也聚衆圍之征南所向衆無不受傷者歲暮獨行遇營兵七八人挽之負重征南苦辭求免不聽征南至橋上棄其負營兵拔刀擬之征南手格而營兵自擲仆地鏗然刀墮如是者數人最後取其刀投之井中營兵索綆出刀而征南之去遠矣凡搏人皆以其穴死穴暈穴啞穴一切如銅人圖法有惡少侮之者爲征南所擊其人數日不溺踵門謝過乃得如故牧童竊學其法以擊伴侶立死征南視之曰此暈穴也不久當甦已而果然征南任俠嘗爲人報讐然激於不平而後爲之有與征南久故者致金以讐其弟征南毅然絕之曰此以禽獸待我也征南名來咸姓王氏征南其字

也自奉化來鄞祖宗周父宰元母陳氏世居城東之車橋至征南而徙同畧少時隸盧海道若騰海道較藝給糧征南嘗兼數人直指行部征南七矢破的補臨山把總錢忠介公建□以中軍統營事屢立戰功授都督僉事副總兵官事敗猶與華兵部句致島人藥書往復兵部受禍讐首未懸征南終身菜食以明此志識者哀之征南罷事家居慕其才藝者以爲貧必易致營將皆通慝懃而征南漠然不顧鋤地擔糞若不知己之所長有易於求食者在也一日過其故人故人與營將同居方延松江教師講習武藝教師倨坐彈三弦視征南麻巾緼袍若無有故人爲言征南善拳法教師斜盼之曰若亦能此乎征南謝不敏教師軒衣張眉曰亦可小試之乎征南固謝不敏教師以其畏己也強之愈力征南不得已而應教師被跌請復之再跌而流血破面教師乃下拜贄以二縑征南未嘗讀書然與士大夫談論則蘊藉可喜了不見其爲麤人也予嘗與之入天童僧山燄有膂力四五人不能掣其手稍近征南則蹶然負痛征南曰今人以內家無可眩曜於是以外家攙入之此學行當衰矣因許敘其源流忽忽

九載征南以哭子死高辰四狀其行求子誌之生於某年丁巳三月五日卒於某年己酉二月九日年五十三娶孫氏子二人夢得前一月殤次祖德以某月某日葬於同譽之陽銘曰

有技如斯而不一施終不鬻技其志可悲水淺山老孤墳孰保視此銘章庶幾有考

前鄉進士澤望黃君壙誌癸卯

天啓忠臣之家其後人多有賢者而兩浙之黃魏爲最著魏忠節公三子子敬死孝子一子聞文譽甚盛忠端公五子二人尙幼不肖與晦木澤望其姓名亦落人口當是時考官之入棘闈者皆欲得此兩家之後人出其門下丙子李映碧搜澤望而不得已卯陳臥子搜晦木而不得不肖入南闈則搜者在北入北闈則搜者在南得之者僅子一耳乃甲申之變子一遲十日之死怨家緣飾其事悲哉余兄弟二十年以來家道喪失風波震撼雖爲論者所甚惜然讀書談道窮巖冷屋要復人閒推排所不下則嫣然相對於霜落猿啼之夕者自信有

不以彼而易此也昔先公在詔獄冥眩之中有老人屈指同難諸公而較之曰他日惟公最吉不敢以其言爲誣也今者無端奪吾澤望以去始愴恍而疑於其言矣澤望諱宗會字之者甬東陸文虎以其窮經似先儒黃澤楚望也生於宛陵之官舍自幼倣儻不羈先公謂此兒成就未定但知其不逐牛馬行隊者六歲時沿河搨蟹爲戲有塾師詣之曰蟹精善搨蟹澤望以搨蟹之杖跨之疾走而應曰龍子慣乘龍塾師縮頸異之十六歲補博士弟子員爲博菴黎公所識拔又三年丙子乾所劉公以第一寘之明年歲試復第一遂廩於二十人之又一又明年許公平遠提督學政一時譽望所歸不敢以他人先澤望及試題有脫誤許公特召郡縣言其故曰吾故欲首某而不可奈何發案澤望入許公謂之曰子有文名而疎略如此將無恃才而輕讀書乎澤望傲然了不陳遜直對曰疎略則有之書故無所不讀也許公變色而弟子員千餘人皆驚竟填二等時許公之意欲使其謝過而後高第之也壬午御史觀風第一甲申拔貢未廷試而國變是時澤望年二十七耳而場屋坊社已歷十餘年之久行輩視爲老

師名宿方縱橫指取一旦斂而與農樵爲伍其中若有不適然者始放之於酒其所與爲酒人者又不過里胥田父無所發其憤憾於是小人者僞爲問字求業以示親附澤望亦遂臨觴高談割臂痛哭驟長其聲價蓋不知坐受其愚弄也亡何兩子同日死壬寅遇火廬舍蕩然婦隨以瘞死天又以意外困之癸卯四月予至語溪澤望尙強飯如故踰月急信告危余馳歸視疾已不可起至八月初八日卒距所生戊午得年四十有六澤望少無師以余爲師余初讀十三經字比句櫛三禮之升降拜跪宮室器服之微細三傳之同異義例氏族時日之雜亂鉤稽考索亦謂不遺餘力然終不及澤望之精冥搜博覽天官地誌金石算數卦影革軌藝術雜學蓋無勿與予同者其詩初喜僻奧余一變而之冷淡澤望亦變其文華藻錯落頗以王微范曄爲則余謂此一種文寧以音節不同六朝便高擡其氣骨耶澤望不以爲然已亦日就刊落而蹊徑頓盡此詩文之無勿同也自濂洛至今日儒者百十家余與澤望皆能知其宗旨離合是非之故而澤望忽折而入於佛其初遇學佛者概而信之凡喫菜合眼躲閃籬落

之徒便降心而與之交及穿剝三藏窮歲累月稍稍出而觀今之所謂宗師者發露其敗闕亦遂牛毛繭絲爲其教之書數十萬言余於釋氏之教疑而信信而疑久之知其於儒者愈深而愈不相似乃爲澤望反覆之蓋十年而不契終於不可同而止然余賦性偏弱迫以饑寒變故不得遂其麋鹿之一往屈曲從俗姑且不免深恨釋氏根塵洗滌未淨而澤望負氣好高口含瓦石疇人率爾必欲突兀自異亦自度不可與世接乙酉以後未嘗一渡錢塘山與江邨枯槁憔悴呼天搶地竟隕其身是豈學佛者所宜有然則澤望之學佛將無憤憾之氣無所於寄其亦如屈原之於騷孟郊之於詩張旭之於書耶故相宗性海卽彼教中之耑門者尙且入而迷其向背澤望乃能算沙搏空其精也乃其所謂憤憾之甚者耶曾祖諱大綬祖諱曰中贈封皆太僕寺卿父諱尊素山東道監察御史謚忠端母姚氏封淑人娶梁氏繼劉氏吾友瑞當之女子在者一人百

□女二人長適馮官儀御史中丞留仙之孫也次字邵某卒之次月附葬化安山賜地之左距餘姚城二十里余嘗謂孔子嘆顏回好學今也則亡其學不僅

指讀書而言然讀書亦學中之一事今之天下千百輩中求一讀書之人而不可得聞其人有志於讀書矣未幾類有物以敗之此無他不好故也澤望墮地來書卷未嘗一日去手丙子場後卽爲日記所讀之書件繫於每日之下如督逋負不中課不休最其三十年中所未盡讀者獨道藏耳一日對客談名山舉似其路徑宮觀畫地而尺寸之客言君曾至耶澤望失笑而起蓋皆得之書本者也其所著書縮齋文集若干卷縮齋日記若干卷學御錄一卷瑜珈師地論注若干卷成唯釋論注若干卷若澤望者以讀書而言亦可謂之好學也已又不幸以憤憾損其天年豈讀書種子真欲絕於世乎癸卯十二月十二日

陳母沈孺人墓誌銘庚戌

余友陳同亮改葬其生母爲之稅服三年夫稅服者過時而服其日月亦近耳顧二十餘年之遠則與生不及者同例同亮不行改葬之總而服已絕之服率意違禮無乃蹈子路當除不除之過伯魚旣除猶哭之失歟已而陳子介眉狀其事乞銘於余而後知其不忍哀愴之情始出於此也孺人姓沈氏杭州人年

十八歸於侍御平若陳公公故鄞人未有子嗣遂買屋武林以處孺人明年同亮生又四年嫡母周恭人歸同亮而子之孺人仍處武林思子不置踰年而卒年二十四侍御爲文哭之權厝湖上當是時同亮壓於嫡母於孺人之喪不能親焉又二十餘年侍御恭人相繼謝世同亮始迎喪武林歸葬於鄞詩云欲報之德昊天罔極此凡爲人子者之言也孺人亡以思子爲之子者又獨何心宜乎同亮之哀於凡爲人子者加一等矣梁沈崇僚以母死喪禮不備復於葬後更行服三年武帝據禮敕斷崇僚終不得行其志檀弓兩卷皆言物始三年稅服自同亮而始何必有例乎同亮方與諸子修講經之會肄業及三禮諸子之論其亦有同異否耶嗟乎先王制禮以斬齊功總爲其文以不飲酒食肉處內爲其實昔之居喪者雖文實未必相稱然猶勉強爲之不敢廢也二十年以來所謂喪服者率加元絲於首蒙黑繒於身是孔子之不以弔者而以之待其父母蓋三年之喪從是而廢矣夫於天下之所共行者莫或行之況能行天下之所不行乎吾欲以同亮之事書之爲天下諷也孺人生於萬曆丙辰正月二十

日卒於崇禎己卯五月二十五日己酉十二月十六日葬于千丈鏡之原子一
自舜字同亮庠生女一適周徵泰孫男一憲淇孫女二銘曰

西陵風雨下有安宅潮東來兮兒無饑渴汝東去兮兒無寒熱雖有安宅其如
潮汐越山雨水生來未識生遊尚苦何況死陟丹旄白羅有兒在側有兒在側
便爲樂國

唐烈婦曹氏墓誌銘

烈婦曹氏諸生穎洙之女海寧之翟墩里人年十九歸同邑唐之坦之坦之父
煥亦諸生也歸六年而之坦病烈婦悉賣其簪珥裝奩以佐醫藥衣不解帶者
半載疾革謂其夫曰君死我不獨生乃營砒霜以待丙辰歲九月二十八日之
坦卒烈婦治喪衣衾必有副家人阻之不得因斥去其砒霜烈婦瀝桑灰爲汁
飲之腹痛而不死明日夫將殮恐死之不及是時也碎錢爲屑吞以速之又
不
死夫既殮而防之者愈虔烈婦曰頃欲與夫同殮既失此期何日不可死而必
以今夜乎家人信之人定烈婦潛起飲溲升餘號呼宛轉毒裂經時復吐下而

解烈婦曰我求死不得計惟有絕食耳不食二十二日而容貌如故神理炯然夜半啓戶出投於傍舍池中久之而家人始覺出之池已死覆以衾而復活烈婦謂其舅姑及母曰大人非愛我徒苦我也我志已決遲速總一死耳於是復飲食起而操作如常尋翦其機軸製衣一稱餘布七尺有小婢乞之不與家人竊議曰尺布尙惜其不死明矣其時庭中蠟梅方開烈婦視而嘆曰昔董節婦有菊花詩美其不落也此花亦不落吾試詠之添得冰霜枝葉無此花自與衆花殊共知秋菊貞心在尙有黃梅抱樹枯十二月望起而嚴粧於天地影堂靈座舅姑舅之姊各設四拜曰婦從此別矣孝養之願以俟來生家人皆哀慟烈婦從容自若從此又不食除夕得聞取其七尺之餘布自經夫柩之旁始知不與小婢之故也及殮目瞑口闔不同乎世之爲縊者此固獨行其願之一徵矣年二十五許邑侯詣廬祭之聚觀者數千人莫不爲之歎息泣下嗟乎古今死節者多矣曾未有如烈婦之死而生生而死人世痛苦之事備嘗殆遍者文文山服腦子二兩不死絕食八日又不死何意身親見之此如黃河一瀉千里非

積石龍門呂梁之險不足以見其奇一番求死一番於燦天若故遲其死以極正氣之磅礴或疑守節爲經烈婦所爲似乎賢智之過夫溧陽女子一言而沈身王凝之妻倉卒而斷臂古人於生死之際處之至精今人見其爲輕耳承流襲敝隨地可以解免名節蕩然不獨在女婦也當烈婦絕食之久余在講堂有傳其屬纊者仇滄柱謂吾黨盍及是時爲式閭之事庶幾死者一聞之也余與同學二十餘人爲之一往已聞其入水不死余恐其因吾黨而激之以不得不死乃致語其舅言貞之未嘗劣於烈也是後余返姚江竟不相聞今年二月至武林陳子榮子文迎謂曰烈婦死矣將死烈婦謂其舅曰吾願見黃先生一拜而死今已矣嗟乎風雷雨雪作於除夕烈婦之志可以激天豈待人激是則余之陋也某年某月某日與其夫合葬於某所其舅請銘余不得辭銘曰
培之厚藏之密三尺墳千年室記城冢慎勿逸

王孝女碑丁巳

王孝女者慈谿王孜之女也居城之東偏歲丁巳七月十八日夜二鼓失火孝

女母卒停柩於中堂孝女處樓上趨至中堂疾呼昇柩無應者已而火至孝女伏棺上不肯去其父從火光中遙見之抱之而出則已死灌以礬水稍甦聲出咽閒僅絲髮問母棺出否家人不答遂哽咽氣絕時年十五也先是四月之盡城中菊花盛開觀者絡繹不知其爲何祥也至是而有孝女之事孝女顧委巷中紅女織兒耳天地不以其渺末而氣候爲之密移則夫今日之撐駕天地者其不在通都大邑之□口貴人亦明矣古來火逼親棺守死勿去者東漢之蔡順古初晉之何琦齊之傅琰梁之徐普濟元之余丙祝公榮郭通陳汝楫明之楊敬祝大昌鄧翰陳倫然皆幸而得免其不免者則宋賈恩隋李孝子明唐治始三人耳然皆男子以女弱而殉身者僅一孝女而已誄曰

天地晦冥正氣滿譚忽然發作在於單寒有如奔流壅塞勢不能函決口而出動魂摧顏伊惟孝女幼而窈窕萱草霜披帷堂月暴粉書識魄鏡臺留照所以孝女米鹽必告未火之先家中細事孝女必告柩前而後行 嚶嚶出出夜半融風火如狂濤烟燄蔽

空孝女不見烟燄而見母容豈忍絕裾離此簾櫳舉室奔迸而少一人有伏棺

者電光繞身時負而出已絕呻吟攀水三咽一絲氤氳母棺出否旁無答者恨
此一身不與同赭形為父留魂不母舍闔然而瞑哀動城野曹娥投水王女赴
火水火死形死仁不可百里千年雙碑翠鎖吾作讜語江流不墮

南雷文定前集卷八

其不遇新藥大醫之國曰... 中為文... 外間... 分計... 父母...

南雷文定前集卷九

餘姚 黃宗羲 太沖撰

移史館熊公兩殷行狀

熊公諱汝霖字兩殷世居餘姚之天花街祖某父某公登崇禎辛未進士第授同安知縣爲政不避強禦直行己意紅毛入寇公渡海敗之於下門考選戶科給事中辛巳江南荒疫人死且半米價四兩有餘轉運不至命給事中七人催督漕糧公當江南上江黽勉從事不使病民遼練正耗二百四十一萬石如期而集沿途見聞無不入告上以朝臣不足任使所用文武踰繩越契而左官外附之徒競張空虛以邀榮路公以爲破格不如循常聽聲不如採實武臣只用甲科行伍凡敘功御覽名色一切報罷會推大將亦須保舉事敗連坐舉主庶杜債帥之門又言時值艱難安危省括懸於督撫以臣裁量多不可以備倉卒也關督范志完事口舌而習調欺順撫潘永圖何所優長況當軍旅宣督江禹緒陽和兵譟風裁掃地宣撫李鑒忸怩小利不持士節保督侯恂凡偶近器鳳

督馬士英嫗媢名勢秦撫蔡官治威恩淺薄襄藩陷而楚撫晏然南陽破而鄖撫無恙皖撫黃配元僅百里之才保撫楊進非鎖鑰之選臣非敢薄待天下士謂方今督撫盡皆非人大聲疾呼欲使其內手捫心量力自陳耳力言孫傳庭不宜急戰不聽而敗京師戒嚴公分守齊化門隨時條陳四月之閒三十餘疏皆切中機宜多所彈治上亦佳其敢言召對咨諏公言行閒諸臣去彼數百里而軍不敢一望顏行大約南去則我隨其後北返則我出其前如廝隸之於貴官負弩前驅望塵靡及耳兵士一聞督戰便洶洶欲叛如此則將不能御兵何名爲將督師不能用將何名督師興言及此督將之肉其足食乎巡按陳昌言奏淄川鄉官孫之獬夢關壯繆語之爾等安心守城我以神兵出戰遲明瞻像汗下如兩公言山東州縣十去七八而獨効靈一淄川壯繆正神而獨降夢一之獬此何爲者乎之獬逆案中人士論棄之豈神偏鑒之乎爲此言者不過欲借神異之說達其姓名於御前以爲異日然灰之地縣官從而和之奇矣按臣不加駁正而據以入告何異夢中說夢也竊謂淄川之夢涿城之守同一機關

遠法王欽若之閉門誦經近類楊嗣昌之華嚴退蝗可怪也公於朝廷舉動失當知無不言言無不痛熊開元姜琛兩給事之獄藪山全椒之去斷斷廷諍不肯但已當時號爲能諫者亦必揣摩宛轉以納其說而公之發言麤梗有敵以下所不堪受者有犯無隱蓋其天性然也止以降謫而去烈皇可謂之能容諫臣矣公言楊嗣昌負國尙未處分誰爲嗣昌畫練餉之策驅中原百姓爲盜者沈迅也誰爲嗣昌運籌以三千守襄而賊以十七騎入城遂出逃者余爵也誰爲嗣昌援引乙榜開府受事卽敗者宋一鶴也情面賄賂斷送封疆二祖列宗之靈能無飲泣地下乎執政旣苦其諂讓上以飲泣一語致怒降福建按察司照磨南渡起補原官轉吏科公言諸臣爭誇定策罔計復讐處堂未已且爲鬪穴始之武與文爭繼而文與文爭殿廷之上無人臣禮其言起阮大鍼也陰陽消長閒不容髮甯博採廣搜求奇材於草澤胡執私違衆翻鐵案於丹書閣臣此舉無乃負先帝負皇上乎其言四鎮也一鎮之餉至六十萬勢必不供卽倣古藩鎮法亦當在大河以北開屯設府永此帶礪曾堂奧之內而遽亦藩籬視

之其言復廠衛也廠衛之害橫者借以樹威黠者因而牟利人人可爲叛逆事
事可作營求縉紳慘禍所不必言小民雞犬亦無甯日先帝十七年憂勤曾無
失德止有廠衛一節未免府怨臣民新建每事持正其待同官嘗乏溫潤之色
馬士英恨之使其門客朱統鑣造作飛條跳梁大叫公言么膺小臣爲誰驅除
聽誰指使上章不由通政內外交通神叢互借飛章告密墨勅斜封端自此始
可不嚴行詰究用杜將來又言先帝篤念宗藩而聞寇先逃誰死社稷先帝隆
重武臣而叛降跋扈肩背相踵先帝委任勳臣而京營銳卒徒爲寇藉先帝旁
寄內臣而開門延敵反在禁旅先帝不次用人而邊材督撫首鼠兩端超遷宰
執羅拜賊庭思先朝之何以失卽知今日之何以得九月出差陞辭言朝端之
上議論日新宮府之閒揣摩日熟自少宰樞貳悉廢廷推四品監司竟晉詹端
之席追贓定罪無煩司寇之章雖然睿斷之無私未免羣情之共駭況乎蹊徑
疊出謠詠繁興一人未用便目滿朝爲黨人一官外遷輒訾當事爲可殺市井
狡獪耽耽得官呈身應募以備推刃上變之用者環伺而待發逐客之令時聞

翩翩之鄰未已假然而隻手足戡禍亂羣小可致太平即使驅除異己別用同心吾輩自然退聽其奈總總報復切切更張置國卹於罔聞逞私圖而得志黃白充庭青紫塞路打成一片富貴世界六朝佳麗復見今時昧卻晉宋梁陳後來一段公案也其時黃耳鼎陸朗方以例轉傾側孽臣謹曉冢宰朗出餞公適邸抄傳至朗讀公疏一字一擊節及至一官外遷二語聲忽中止相對默然會稽之守畫江而營公之意欲令諸師畢渡沈舟破釜爲不返之計如其不濟則亦八千子弟豈復東還五百島人不脫劍鏗而已身提孤旅不滿千人從小壘渡江札喬司倡率羣帥而皆契需觀望無一應者公進至海寧集其父老豪傑激揚忠義辭酸淚血聞者莫不感動旅拜轅門者且萬人別營伍分汎地以本邑進士俞元良司餉指揮姜國臣主兵浙西塵起沿海烽燃一時號之爲熊兵公大小數十戰親臨矢石累經覆沒志氣不爲之少衰加兵部右侍郎兼左副都御史總督義師亡何而閩使劉中藻至欲以江上之師受其約束行朝洶洶且議開讀之禮魯王亦將近就藩服獨公持不可言主上原無利天下之意唐

藩亦無坐登大寶之理有功者王定論不磨若我兵能復杭城便是中興一半
根脚此時主上早正大號已是有名較之閩中乘時擁戴奄有閩越者規局更
難例論千秋萬世公道猶存若其不能而使閩兵克伐武林直趨建業功之所
在誰當與爭此時方議迎詔亦未爲晚自公此議出人心始定閩使始返丙戌
六月朔浙河兵潰公扈監國由海道至閩而隆武走死郡縣已皆降附王以公
爲東閣大學士會兵於長垣分道攻取先後得三府一州二十七縣戊子王在
閩安鎮時國事皆專於鄭彩彩暴橫公每折之以禮彩與定遠伯周瑞交惡公
稟擬恆右瑞彩積恨之旣而彩與義興伯鄭遵謙爭商舶嘗恐謙之襲己公自
閩安至瓊琦休沐守瓊琦者彩之神將李茂也與公奴子爭口元夕熊鄭兩家
同郡相問遺茂卽以合謀告彩公遂爲彩所害并其幼子投海中公報國之心
九裂不恨然吳鉤枉矢飛火狂濤皆鑿公之忠全軀橫海之鯨而受制於螻蟻
謂之何哉夫神器流離草創未有成緒公何不引閩師爲助而分唐分魯自開
瑕隙議者以公爲闇昔梁元帝以簡文制於賊臣太寶改元卒不遵用逮侯景

授首而後焚柴頌瑞隆武之制於鄭氏猶侯景也公而奉詔亦豈能轉其斗粟發其一甲乎徒使江上離心行閒之精神徒爲福京之媚悅耳此舉固與元帝無異也然則公何不勸監國卽真以繫波蕩之人心議者以公爲迂昔光武既貳更始遲之一年河北旣平而後受命事之無成天也天若假其始願焉知卽非白水嗟乎踵百王之末當陽九之會帝昺何益於運數監國不稱位號涉川龕暴力絕而亡留此無利天下之心皎然千古其視受終如敝蹠也公之所慮不亦遠乎公子茂鼎介余族叔應蛟求序公事公魄不返公魂無廟幽銘陽碣無地可施爰撰行狀一通移之史官以爲列傳之張本也

移史館吏部左侍郎章格菴先生行狀

會稽章譽持格菴先生家傳以余爲先生同門友也再拜乞行狀將以上之史館先生在崇禎閒爲一代眉目豈可令其遺事舛駁零落乎謹以故所聞見狀之先生諱正宸字羽侯別號格菴會稽人也爲道虛望族祖□父□先生爲子劉子內姪從而稟學爲人誠樸近道深爲子劉子之所契許舉崇禎庚午鄉試

歸至濟寧聞報同舟有李科者先生師也先生不忍其失意獨歸偕返而後北
轅明年登進士第選庶吉士授禮部給事中上求治太急烏程復以功利導之
先生言伏見陛下洞照羣情有先事爲察之哲鈐束百辟有以力勝殘之威登
咸三五有其臣莫及之聖是以合意者爲忠良睿算曾無改變以至急賦之開
釁錮罪之失情追往之稔惡告密之府奸羣心嗟嘆盜賊披猖求治愈急而愈
遠矣亦惟是語默動靜之閒日求放心以周孔仁義爲必當遵以管商富強爲
必當黜以臣鄰吁咈爲必不可厭以億兆耳目爲必不可蒙謹喜怒之端灼善
惡之別則太平宏業自然各得其所蓋先生之言治必本於學術讀者不問而
知其爲大儒之弟子也巴縣烏程之衣鉢也癸酉入相先生奏彈應熊剛復自
用縱橫爲習小才足以覆短小辯足以濟貪一旦大用必且芟除異己驅除善
良報復恩仇混淆毀譽且訛言何所不至賁緣左右士論所恥從此薰心捷足
之徒颯馳而起矣疏入下獄馬世奇王邵爲先生過巴縣曰章長科此舉成就
老先生爲潞公矣巴縣艷然曰這箇皇上某如何做得潞公然上亦不深罪放

還田里丙子冬起戶科先生言方今大臣持祿養交刻深難犯揣摩宮府張設
爪牙知護一官小臣習爲恬默冀以自完盱豫邀求隨機觀望知護一身通國
臣僚盡爲聲名利祿無一人爲陛下者陛下以孤危之身居臣民之上受人欺
給豐兆百出臣切傷心大抵爲烏程而發戊寅五月火星示變時田貴妃與中
宮不協上久不見中宮武陵故以田畹進上疏微及后宮爲給事中何楷所駁
先生亦言火于五德爲禮陛下未嘗以沽名市恩疑大臣也而大臣揭救鄭三
俊錢謙益倡爲是言疑陛下甚矣是謂無禮史莖辨疏一曰時局再曰時局理
元黃之說開羣枉之門亦無禮也朝廷每一番令甲卽增一番徑竇張樞芳京
察不謹借城工以復銓職亦無禮也災異頻仍陛下方發罪己之詔而李鳳鳴
稱善言不可退星猶揮戈不可卻日亦無禮也然則熒惑焉得不垂象乎時廠
衛橫甚先生又言西廠雖革而西廠之實尙存西廠之任雖虛而昔日把持西
廠之人尙在昔云陛下不知則宮掖之閒肘足之際尙且迷罔天聽而沉於三
輔郡縣乎上令中官自行回奏氣勢爲之少衰辛巳賊陷洛陽福王被害上召

對羣臣於乾清宮先生奏闖賊從四川來奏未畢樞臣陳新甲從旁急應曰賊自秦來不從川來言至再督師楊嗣昌奏流賊九股已撫其八只張獻忠與曹操逃入蜀闖賊在獻忠一股之內今從川來所過地方不見攔截則嗣昌之欺君露矣新甲表裏爲奸故不禁其辭之暴也尋長吏垣先生言治之盛衰由於言路之通塞臣爲六垣之長苟一垣不言一事不言皆臣之責也一日召對上厲聲曰言官須是設身處地奈何苟且塞責先生對設臺諫本以求言甯言不當無使其畏而不言願皇上勿生厭薄宜興再召悉反前政引用正人撤回差璫停止緝事蠲租清獄行閒賞罰朝報夕可天下仰望丰采刻期太平而門多雜賓性少剛節先生故宜興之門人也謂其一時之君子曰吾輩當夾持相公以成就其功名無徒將順以爲臧氏之美疵也會推宣大總督宜興欲以門生江禹緒陪之先生不可冢宰承宜興意江爲正推先生劾冢宰私易不道宜興欲起江陵令史調元先生於其名下注一鑽字遂止宜興之起涿州之力也宜興無以報之欲借守涿之功復其冠帶先生與金光辰孫晉固執不可亦中格

且上言閣臣先格君而後事功可建亦必先積誠而後君心可格人主菲薄朝士必因外廷無一人一事足稱意旨苟能不與中官作緣不憑恩怨起見不以寵利居成功不以爵祿私親暱自起皇上敬信矣宜與雖恨先生然終先生在朝形格勢禁亦不至大段放倒賄賂如後時也先生又舉史可法范景文孫傳庭蔡懋德可任司馬以爲國事日壞皆由司馬之不忠賄賂不絕情面不除推諉不屏欺朦不破恩仇不化軀命不捐以致刑賞倒置功罪混淆臣不知兵安知人之知兵所可信者諸臣夙具肝膽自矢忠義愈於蠹國欺君寡廉鮮恥之陳新甲耳壬午五月會推閣員先生與冢宰李日宣河南道張瑄共事先推十三人上命再推又列十一人六月辛酉召對中左門上怒徇私濫舉如房可壯宋玫張三謨何故得與日宣對畢先生奏日宣平日游移少執持臣曾有公疏糾之第此番推舉實無徇私卽房可壯三人未必果堪輔弼論其生平頗知自好上怒未解下先生等於獄遣戍均州先是無名子效東林點將錄故智以二十四氣分配朝官達之御前於是閣員兩推所不及者流言以實之上聰明旁

寄遂以爲然南渡以原官召先生上疏一曰勤學春秋爲孔氏要典宜選方聞之士朝夕進講高皇帝祖訓備歷艱難尤宜時時省覽一曰辨官易言開國承家小人勿用其乘時射利僥倖顯榮口舌得官者不宜輕開濫門一曰肅綱紀肘腋之閒威令不行四海生心今於藩鎮之中忠勇可任觀望不前速宜分別以就鈐鍵一曰正人心天啓之季喪心媚逆餘孽猶存薰蒸彌甚今茲附賊豈緩刑章又疏陛下宜縞素帥師親臨淮甸聲靈所震人切同仇而乃不稱行在粉飾儀文志在偏安竊恐偏安之業亦未易也馬相將起阮大鍼舉朝爲難銓衡不敢任其責欲假中旨起之司空缺先以中旨陞張有譽先生封還詔書不聽上言臣於有譽非爭其人爭其事也傳陞一途非所以待正人君子有譽賢者未必卽受是用有譽者乃所以斥有譽也魏國公徐宏基公疏薦張捷有旨部議先生曰何議爲因言勳臣無薦舉文臣例使其人果賢者必恥受勳臣薦舉已而以安遠侯柳祚昌疏遂起大鍼先生言朝廷如此舉動邸報流傳第見微臣姓名尙掛仕版必且相顧驚駭謂臣負先帝之經綸負陛下之明詔負銓

選之權衡負瑣垣之職掌罪當萬殛穴地難容伏望早賜罷斥以爲不忠之戒
蓋先生大指以親君子遠小人爲立國根本不以小朝廷而少有阿邑故與羣
小爭射斷斷猶冀稍延國命而無如天生妖孽非人力之所能爲乎旋以大理
寺左丞歸江上之役以先生爲吏部左侍郎署部事事敗先生溺水不死自刎
又不死行脚不知所往吳市抱關曾干封事靈隱續句以避揚鱗固先生之高
致也先生從子劉子講學最重風節余嘗聞其評品人物曰太守張有譽蔡屏
周入覲送監督戶工二部內官文冊長揖不跪天下郡縣只此二公又曰關中
一細民與馮少墟講會從此口不二價一日過縣治見學會中二縉紳入謁縣
令愕然曰渠亦爲此耶終身不屑入會嗟乎使先生而首邱念重當時何以稱
此細民乎余嘗念陽明之學得門人而益彰吾劉夫子之學尙未大行于天下
由門人之得其傳者寡也已而思之彰陽明之學者不在講席遍天下之門人
而在孤高絕俗之門人如兩峯念菴之徒是也吾夫子之門人當金石變聲金
鉉吳麟徵祁彪佳葉廷秀王繇蒼死爲列星而先生力固首陽又參錯于其閒

他日追遡淵源以來其學卽無龍溪心齋一輩庸何傷其過陽明遠矣謹狀

移史館先妣姚太夫人事

先妣姚太夫人生于萬曆甲午十二月初二日卒于康熙庚申正月初十日享年八十有七十六歲而歸吾忠端公天啓元年敕封孺人四年以御史覃恩再封孺人崇禎元年誥封淑人十七年進封太夫人生五子長卽不孝宗義次宗炎次宗會次宗轅次宗彝太夫人姓姚氏太僕寺卿翔鳳之從孫女父諱克俊字順字鄉飲大賓母徐氏世居上虞之渣湖來歸時曾王父贈公曾王母章太淑人皆在堂三世同居內外數十人而太夫人長羣婦承巾奉帚羣婦皆視一十六歲女子爲進退贈公治家嚴肅羣婦時有譙讓而獨賢太夫人曰新婦大家氣度無儒酸農瑣之態他日定爲貴人顧我不及見矣丁巳先公授寧國府推官太夫人在寧國五年署中落然不聞人聲始入後出中閒不識司李廳屏癸亥入京師是時逆奄竊政黨論方興楊左諸公多夜過邸寫議論時事燭累見跋僮婢頭觸屏風而太夫人管句茶鐺酒壘無失候魏忠節見過尤數每過

必以小人陰謀相告形之歎息忠節去太夫人迎謂曰得無又有歎息事耶乙丑出都門明年而難作先公被逮太夫人每夜向北辰而拜祈聲酸苦丙漏將盡聞者無不欲泣先公遺命五子撫之羣妾嫁之苟風波麤定不失爲黃竹農家太夫人不忍嫁羣妾皆聽其母家迎去每哭先公至于暈絕不孝苦相勸解太夫人曰汝欲解我第無忘大父粘壁書耳蓋大父以義頑鈍於義出入之處大書爾亡句踐殺爾父乎八字揭之於壁義受教痛哭太夫人哭乃止天子旣誅逆奄哀憐忠死之家副笄狄衣加換三品一時名公鉅卿皆就拜謁問起居步幃棖臬之間天下想望風烈太夫人初不以此自異奉事兩人寢門竈下煩辱之任加於娣姒一等王父病革太夫人不煩諸父命義出營棺木得美櫬王父見之而喜謂太夫人曰吾有三子在而窀穸之事惟一婦是辦汝後必有達者王母之沒適舉債六十金太夫人盡出以供喪事或言之急而舉債舉債而不以應急可乎太夫人曰更無有急於喪事者也先公弟三人子五人王父以先公無私積將分財爲八各授之王父喪後諸父爲政曰孫不得與子同盈縮

也於是五人受四分之一太夫人訓諸子曰汝曹能讀父書先業有無不足計也崇禎末宗義宗炎宗會頗有時譽宗轅亦習科舉顧功名可以戾契致太夫人憂思稍解乃未幾而黨禍復興阮大鍼招搖白下儀部周仲馭出南都防亂揭集諸名士以攻之而以顧杲宗義爲揭首次桐城左國棟宣城沈壽民大鍼得志修報復旣曲殺仲馭左沈皆變姓名去遂批徐署丞疏逮杲及義宏光遜位不及於難驚魂未定而四方兵起乙酉奉太夫人徙中村丙戌徙化安山丙舍丁亥返故居己丑山中亂徙邑城明年返故居丙申山中又亂徙半霖其秋返故居己亥海上亂防海之師望門而食徙三溪口明年冬返故居甲寅羣盜滿山徙海濱之第四門乙卯後五月始返三十年之中流離轉徙矻矻靡有定居其閒與村郊之婦女持橐束縵而立塵起疾呼以遁須臾之命者又不知凡幾自乙卯以來風鶴稍息太夫人早起日誦金剛經一卷誦畢置曾孫小孩於膝口授唐詩絕句一二首暇則述閭閻碎事句女孫輩一笑方謂此樂可常豈知安居數年亦爲造化之所吝耶古來章妻滂母受禍不過一時而太夫人始

遭東林黨禍繼之以復社黨錮又繼之以亂亡捕獄則操兵到門避寇則連繩貫掌覆巢之後復遇覆巢辛苦再立之戶牖頻經風雨一生與艱危終始卽古來之節婦賢母著名不過一節而太夫人上書代死似忠愍之夫人膝下皆爲名士舉觴賜子似伯仁之母執經講舍諸生先起居太母似忠介之母九十萱親養堂東帛又似依齋之母隨舉一節皆應史法太夫人兼之蓋天不以尋常婦女之境遇處太夫人太夫人亦遂破荒於婦道母道之變局故五十稱壽祥光遍於帷帳一年廬墓甘露降於青松豈非天也每當太夫人壽辰海內鉅公多有傑作以表徽音畿山劉夫子徐忠襄施忠介相國瞿稼軒朱文靖孫碩膚中丞方孩未陳于庭儀部周仲馭徵君沈眉生蘇武子陳定生其著也史館諸公亦考信前言知義說之不妄也

監修徐立齋先生爲之特傳於列女是吾母屈於生顧得伸於死子孫當世世不忘也

南雷文定前集卷九

南雷文定前集卷九

南雷文定前集卷九

南雷文定前集卷九

南雷文定前集卷九

南雷文定前集卷九

南雷文定前集卷九

南雷文定前集卷十

餘姚 黃宗羲 太沖撰

周雲淵先生傳 辛亥

周述學字繼志別號雲淵越之山陰人好深湛之思凡經濟之學必探原極委尤邃於易曆古之言曆者以郭守敬爲最而守敬所作曆經載於元史者言理而不傳其法其法之傳於曆官者有通軌通經諸書則死數也顧其作法根本所謂弧矢割圓曆官棄而不理亦無傳之外人者當是時毘陵唐順之吳興顧應祥皆留心曆學求其書而不可得述學竭其心思遂通弧矢之術從來曆家所步者二曜交蝕五星順逆而已自西域經緯曆入中國始聞經緯凌犯之說然其立法度數與中曆不合名度亦異順之慨然欲創緯法以會通中西卒官不果述學乃撰中經用中國之算測西域之占以畢順之之志日行黃道月行九道而古來無所謂星道者述學推究五緯細行爲星道五圖於是七曜皆有道可求與順之論曆取歷代史志之議正其訛舛刪其繁蕪然於西域之理未

能通也又撰大統萬年二曆通議以補歷代之所未備自曆以外圖書皇極律呂山經水志分野算法太乙壬遁演禽風角鳥占兵符陣法卦影祿命建除埋術五運六氣海道針經莫不各有成書發前人所未發凡千餘卷總名曰神道大編蓋博而能精上下千餘年唯述學一人而已嘉靖閱錦衣陸炳訪士于沈鍊鍊以述學言禮聘至京炳服其英偉薦之於趙司馬司馬就訪邊事述學曰今歲主有邊兵其應在乾艮艮爲青州遼東乾爲宣大二鎮京師可無虞也已如其言司馬將具題大用會總兵仇鸞聞其名欲致之述學識鸞必敗先幾還越總督胡宗憲征倭私述學於幕中諮以秘計述學亦不憚出入於狂瀆毒矢之閒卒成海上之功武林兵變述學諭以國運安平不可妄動動則奇禍立至其魁亦信述學之言多驗謀遂寢述學在南北兵閒多所擘畫其功歸之主者未嘗引爲己有故人亦莫得而知也庚午余在南中聞人陳元齡以所著思問初編相示其言太乙六壬多本於雲淵斯時亦未知雲淵之爲何如人也甲戌余邂逅其諸孫周仲訪之於木蓮巷架上堆雲淵神道大編數十冊其冊皆方

廣二尺餘仲言遺書散失此不能十之一二也又見其地理圖縱八尺橫二丈畫方以界遠近每方百里唐呂溫所序未必能過也余欲盡抄其所有會仲遊楚不果丙戌亂後於故書鋪中得中經測圖地理數種丙午見其曆宗通議而後知邢雲路律曆考所載皆述學之說掩之爲己有也庚戌九月坐證人書院有帥其弟子四五人升階再拜者門狀爲周允華問之則仲之諸子也問以遺書所存者惟算學耳余讀嘉靖閒諸老先生文集鮮有及述學者唯湯顯祖有與周雲淵長者書謂卦圖乃是渾儀曆書止是算法必欲極神明之用亦須達虛無之氣觀其言要非能知述學者唐順之與之同學其與人論曆皆得之述學而亦未嘗言其所得之自豈身任絕學不欲使人參之耶天下承平久矣士人以科名祿位相高多不說學述學以布衣遊公卿閒宜其卜祝戲弄爲所輕也雖然學如述學固千年若旦暮奚藉乎一日之知哉

張景岳傳

辛亥

二十年來醫家之書盛行於世者張景岳類經趙養葵醫貫然醫貫一知半解

耳類經明岐黃之學有王冰之所未盡者卽學士大夫亦必累月而後能通之昔在戊寅曾於張平子座上識景岳蓋交臂而失之己酉寓證人書院有蔣一玖者年八十矣欲爲其舅作傳則景岳也景岳名介賓別號通一子越之山陰人也其父爲定西侯客介賓年四十卽從遊於京師天下承平奇才異士集於侯門介賓幼而濬齊遂徧交其長者是時金夢石工醫術介賓從之學盡得其傳以爲凡人陰陽但以血氣臟腑寒熱爲言此特後天之有形者非先天之無形者也病者多以後天戕及先天治病者但知有形邪氣不顧無形元氣自劉河閒以暑火立論專用寒涼其害已甚賴東垣論脾胃之火必務溫養救正實多丹溪出立陰虛火動之論寒涼之弊又復盛行故其注本草獨詳參附之用又慨世之醫者茫無定見勉爲雜應之術假兼備以倖中借和平以藏拙虛而補之又恐補之爲害復制之以消實而消之又恐消之爲害復制之以補若此者以藥治藥尙未遑又安望其及於病耶幸而偶愈亦不知其補之之力攻之力耶及其不愈亦不知其補之爲害消之爲害耶是以爲人治病沈思病原

單方重劑莫不應手霍然一時謁病者輻輳其門沿邊大帥皆遣金幣致之其所著類經綜覆百家剖析微義凡數十萬言歷四十年而後成西安葉秉敬謂之海內奇書班孟堅贊孝宣之治政事文學法理之士咸精其能至於技巧工匠器械自元成閒鮮能及之介賓此書若非遭遇神宗之盛亦莫能有也作古方八陣釋古人立方之意作新方八陣析古方之某藥爲某經之用不相凌奪其書晚出今方行世介賓博學於醫之外象數星緯堪輿律呂皆能究其底蘊在遼陽道中聞御馬者歌聲聒耳介賓曰此惡聲也不出五年遼其亡矣已而言驗所親問以近事介賓曰我夜觀乾象宮車殆將晏駕天下從此亦亂矣未幾神宗崩介賓遂返越其年五十八又二十年始卒卒之日自題其像召三子而誨之其門人曰先生乃死耶吾先生故有不死者介賓莞爾而逝自太史公傳倉公件繫其事後之儒者每做是體以作名醫之傳戴九靈宋景濂其著也而名醫亦復自列其事存爲醫案以待後人遇有病之相同者則做而治之亦盛心也世風不古以醫負販其術無異於里閭俗師也而不肯以里閭俗師自

居雖復殺人如草亦點綴醫案以欺人介賓醫案散在景岳全書余不敘於篇惡夫蹈襲者之衆也趙養葵名獻可寧波人與介賓同時未嘗相見而議論往往有合者

明司馬澹若張公傳

天啓丙戌之際訛言繁興謂三吳諸君子欲翻局而以先忠端公爲謀主於是逮七君子於詔獄必欲殺之五月丁未王恭廠災壞民居十餘里擊死數千人熹宗在乾清宮走避建極殿御座毀折繼又明天宮火災異疊見亘古今所未有詔廷臣修省是時澹若張公爲兵部職方司主事與同官王陞密議因草疏言修省之實刑獄係死生人命董以士師申以覆奏誠慎之也今罪囚半歸詔獄追贓卽以畢命雖其人自不寃而於好生之德無乃未愜乎甚至秋後與不時并律囊首與絞斬同斃痛快之事每干天和自今以往輕重罪囚悉付法曹使罹法者知自絕於天比附者無舞筆之恐罪疑惟輕則冥途有重返之魄罰當其咎則單門無連染之人肅殺之後繼以陽和此其時矣至於軍儲告匱土

木宏規豈不知生財爲急而急土木不如急軍儲議搜括不如議節省今旣搜無可搜括無可括瑣屑凌雜盡以入告竊恐焚林竭澤之後能無魚驚鳥散之憂請自皇極告成暫停工作悉以海內物力併爲軍前見糧寢其屑瑟之誅求益見聖心之惇大俟疆宇廓清再完堂構未爲遲也公銜疏袖中入白堂官堂官長垣王永光也長垣固攻東林者然其人有權術把持局面亦不欲寄乾兒門客之虎落思深慮遠得公疏竟上之上傳覽樞臣所奏停工緩刑言若忠愛朕熟思旬日皇極殿工已抵八九止用銀壹百伍拾萬兩務崇儉約匪雕匪刻邊儲歲解不缺外發帑二千餘萬洪流束楚功績闡然今當節縮皇極之餘經始三殿計外解一百餘萬未至皇考發帑百萬尙存內外臣工乘此一德搜括編派俱無所事苟疆臣民牧齊契工官則乾沒風消怨咨聲泯何功不奏何治不隆乎刑不上大夫崇養士節皇祖成憲奈士不自愛爭爲奸宄如周宗建保熊廷弼於亡遼之後涕唾封疆斂金畿輔創建書院翼戴奸邪惡郭鞏之攻廷弼誣以交結內侍兇鋒狡語遠埋疑案周順昌逗撓詔獄止檻車而結姻挾市

魁以稱亂明與君抗黃

先忠端公諱

請寄爲奸李若星之節鉞鄒維棟之吏部何所

由來撓亂朝政擗搯鄉邦夫朝廷重士士實自輕朝廷建官官反侮上一概縱舍姑息無將之誅春秋謂何難乎其爲上矣諸臣顧動以爲朝廷之過朕甚惑焉海內方汙穢朝廷聞是疏之上莫不舉手加額以爲中流之一壺豈知其殺機已決騎虎之勢不能復下然矯旨之反覆辭費小人之氣未嘗不沮喪矣長垣旣以此去而公有寧錦之功逆奄絀之未幾推補吏部郎中旨以門戶罷之昔李膺在獄賈偉節西行說竇武霍譖訟之呂惠卿與大獄蘇子瞻勸王安石言之竇王皆與奸人異趨故賈蘇之言易入公之於長垣水火也而欲格之以正議此陳了翁不能得之於章惇者公竟得之可不謂奇乎公諱履端字旋吉號澹若世爲華亭人曾祖良佐祖謨父元輔太學生生三子長拱端當陽知縣次卽公次軌端邵陽知縣萬曆壬子三人同舉鄉試公登丙辰進士第出知晉江東鹿二縣皆有能名其大者於晉江得黃石齋先生爲一代大儒於東鹿河決遷縣治二十里築城一千五百丈民不加賦遷者如歸其爲治詳石齋臥子

誌狀公自職方歸禁割朝議放情詩酒烈皇更化以次召骨鯁之臣起公吏部而傷於哀樂不能復赴崇禎元年卒年四十三娶沈氏封安人子三人曰定諸生曰甯曰守康熙壬子舉人一女嫁諸生王世炯公卒後五十五年守函幣以傳文屬余憶乙酉於徐太宰座上識守忽忽交臂不知其爲公之子也皇成□散口說流行余以身所見聞者詮次其事家國之恨集於筆端不覺失聲痛哭棲烏驚起後之覽者亦將有感於斯文

黃醒泉府君傳

正德丙寅謝文正致政歸與馮雪湖相唱和戲排舊韻別創新詞往復至于八九嘉靖辛酉呂文安憂歸與黃醒泉相唱和當花對酒登山臨水無日無之姚江風雅唯此兩時爲最盛承平士大夫之風流今無復有夢見之者矣醒泉則余五世族祖也諱尙質字子殷醒泉其號也吾始祖鶴山十三世孫祖晰父舜卿母邵氏府君生時母有夢筆之祥幼而穎異日誦千言稍長以易爲大師湖守胡君聞其名遣子從學舉嘉靖己酉科浙江鄉試知息縣事府君吏治以教

化爲先民曾珣兄弟訟產府君手書棠棣章與之曰熟讀後始爲若理越數日
詣府君求直府君曰前詩熟否曰熟府君發明詩義慷慨嗚咽珣兄弟感動流
涕不待終章相讓而去或怪其速化府君曰人孰無天性批之以法愈見其汨
沒耳尋遷景州守景州多盜皆勸其刻深爲治府君曰不然景瀕滄海而麓大
行苟如此是驅之爲盜也於是捐鉤距省簿書多所縱舍盜自衰止明年脩董
仲舒書院周亞夫祠自爲文記之相觀以經術使民不遊學堂與撻市同時分
宜竊柄大官多出其門下府君激烈抗憤發言無所梗避聞者惡之分宜旣敗
分宜之黨未衰廉平之譽無由漸朝廷之耳聩勉六載乃自免歸築室烏膽山
讀書賦詩耳目所及分爲十四景片石孤枝題品張皇萬曆丁丑元旦庭誥諸
子手書付之二十三日卒年七十四府君與雪湖皆不受人牽挽雪湖母年九
十固不欲出府君之在景州呂相氣勢方盛府君巉巖偏州未嘗以尺牘自鳴
不平其自重如此府君所最善者楊珂徐渭其詩文書畫齊稱一時而弇州主
盟壇坫士之未捧珠槃者多見詆訶三人崛強不甘於邾莒故徐渭之詩楊珂

之字皆有貶辭於府君無稱焉百年以來渭以袁公安顯珂僅有知者府君姓名幾將湮沒余因選其詩而爲之傳

蔣氏三世傳

蔣洲字宗信別號龍溪鄞縣人補其學諸生好游俠留連管樂平居愛客置酒雅歌投壺高睨大談終日不倦以故人樂與之遊嘉靖癸丑王直句倭入寇烈港直歛人毋汪嫗夢弧矢星入懷而生長而與其徒入海連巨舶載硝磺絲綿違禁諸器物往來互市於日本暹羅西洋各國貲累鉅萬各島君長以下並信服之稱爲五峯船主五峯其號廣有賊首陳思盼者不入直黨直掩殺之併其衆由

是海上之寇非受直節制不能存威名藉甚尋招集亡命據薩摩州之松浦僭

稱徽王置官屬三十六號令島人時時遣部下剽攻沿海郡邑東南危動當是

時胡梅林宗憲開府浙直歷訪奇士而宗信之里人都督萬鹿園表留心人物

謂梅林曰里有蔣生者縱橫之士也梅林遂介鹿園置之幕府宗信曰漢之困於匈奴由中行說也宋之患於元昊由張元也自王直航海遂有東南之禍今

與我爭於鯨脣之上者皆直之分踪也我不得直彼鴟附鼃援其可既乎直之
母妻與子盡在我地彼雖作賊骨肉刺心公如開以丹青之信未有不就戎索
者梅林曰此名計也請於朝授宗信提舉以陳可穎爲副復赦海上亡命十餘
人使之向導直之子澄亦嚙血致書於父曰幕府長者唯願一見阿父以有詞
於朝無他患也乙卯九月開洋至小衢山七日抵五島島倭疑爲商舶將肆劫
勒有僧譯之酋長酋長始郊迎示以天朝宣諭之旨酋長受命乃使人招王直
直至殊作意氣宗信諭之曰君卽不念祖宗墳墓獨不爲老母妻子計乎國家
方急東方誠以此時罷遣衝鯨網絡波臣此萬世刻石之功也兼官重紱舍君
誰適不然倭情貪狡國家縑帛無限購君萬里之外不異庭除矣直感其至言
苦意遂與之同食遞衣言無不盡偕返松浦日本以天文王爲共主然號令不
出國門各島自相雄長豐後山口又島中之最雄者也故入寇者多二島之人
直與宗信同行宣諭明年丙辰至博多津召其色目賞賜旅誓四月至豐後島
主懷音草狀詰以從前作過稽首主臣願貢方物遂令其檢攝風帆凡筑前肥

前等五十三所羣盜盡殄五閱月始至山口島主虔奉如豐後送還被掠指揮
袁進奉表謝罪馳啓天文王十二月天文王下教所部周昉長門等一十二島
徧行禁約對馬薩摩姦宄尤多皆冰駭風散方宗信未至日本時徐海向衆入
寇以數萬人圍桐鄉甚急宗信聞之遂遣陳可穎與王直義子毛烈先歸諭徐
海罷兵如約海詣幕府降而海黨陳東葉麻自相疑貳內亂梅林乘機擊殺之
丁巳四月宗信同王直發松浦海船數十隻貢使四百人流寓六百入碇定海
關七月宗信及貢使僧德陽先入而直艦爲颶風飄墮朝鮮不得偕來宗信在
日本三年諸帥疑其掌握之內價盈兼金從之索賂不應分宜亦望有海外奇
貨宗信又無以自通乃因王直之不至謂其空言無事實巡按周斯順劾奏遂
下宗信於獄九月直始叩關先遣王激入見曰吾等奉命而來宜有使者迎勞
道路今行李不通而戈鋌戒嚴公得無誑我乎梅林曰國法宜爾毋我虞也與
之設誓甚苦直終不信曰果爾可遣激出梅林立遣之復以指揮夏正爲質直
於是使毛烈王激守舟而身入見頓首言死罪且陳與宗信馳驅出百死從此

海有恬波矣梅林多方慰勞權寄獄中梅林與直同鄉宗信出使本許其互市授官及直至流言梅林受賂數十萬爲之貸死朝議闐然科臣徐浦復劾宗憲濫課軍需陰縱蔣洲句引東倭梅林大懼因盡易曲貸王直之疏謂以誘直爲祕計直罪在不赦且謂宗信曰吾方不自保何能敘君功不忘息壤酬君請俟

他日遂疏云蔣洲宣諭日本已歷三年所宣諭者止及豐後山口豐後雖進貢方物而無印信勘合山口雖有金印回文而無國王名稱是洲不諳國體計其擒直合應功罪相準有詔誅直王激毛烈遂殺夏正據舟山征之踰年方解宗信出獄茫然自傷唐荆川順之趙大洲貞吉皆爲之扼腕頌冤俱報罷司馬譚

綸在薊遼召宗信參其軍事欲使一得當以就功名宗信流涕而言曰洲本書生萬里航海父衰老而待盡妻憂怖以致死洲皆不顧惟欲爲國家樹尺寸之效乃功成而謗興屈捐命之功比贖罪之例洲復何望哉公休矣洲不能再側足於焦原矣司馬嘆息久之隆慶壬申中寒病卒於昌平之旅舍余讀茅鹿門

坤紀勦徐海本末以爲倭之入寇皆由徐海故曲折其反覆憚惰之術以著平

倭之要領獨不念徐海爲王直之餘黨直苟無歸命之心則海必不受我之籠絡總使滅一海而爲海者皆是亦安得盡施其鈐鍵乎鹿門但移脅從之治而薄折首之勳不已悖乎宗信致直解東南之厄而身填牢戶此與陳湯斬郅支而下獄亦復何殊然陳湯身沒而名彰宗信姓名曾不得與俞戚大帥之徒隸齒豈古今之時異歟其後沈維敬之使關白垂成而敗身死猶爲僨事者委過成則爲宗信敗則爲惟敬無怪天下之樂爲首施也子有德

有德號蕙江十六歲學易於柯孝廉卽洗除先注業高名輩農丈人余寅君之舅氏也嘆爲東南貴寶不但會稽之篠簜耳十八歲爲諸生擅聲場屋者數十年其閒有已合有司之尺度而分房爭解又復落之同舉者爲之太息郡邑無不虔款太守游應乾一日接之謂其鄉大夫曰蔣子奇才不當以諸生之禮禮之萬曆甲辰以貢元當任府判沈文恭當國避嫌授福建大田儒學教諭準墨伊顏以作士子邑有田副使者毒殺段令令子頌寃以君爲證時閩撫徐石樓故君之主人慮囚董君謨又君之門人副使大懼崎嶇私館以貨自通君毅然

謝之卒無阿悒副使怨毒殊甚君流矢影顧有憂色徐撫以啓事挽君終賦歸田處則檢御風俗坊表一鄉當事欽其名德往往于旄造門崇禎戊辰三月君年八十二母余孺人老而瞽目君搏穎愀辭不懈晨夕冥漠生明祖殯淺土君不煩羣從獨力襄事下窆之時松柏夜明疑有神陰相之者宗人皆以爲孝感所致子之麟之麟字龍友生而穎異奉常余寅僉事王元恭見之皆歎故是後來一器入郡學爲諸生自萬曆丁酉至乙卯六應鄉舉其經義墨守先正愧纏豔粉不能與晚學卑品爭一日之長庭闈之內恩意周浹余孺人病瞽席裯七箸皆於君是賴久而不懈益虔奉常目爲孝孫孺人曰吾非此孫不能有今日矣君以授經爲生計應繩中理取信高門皆以爲堅強一學之士也蘭溪徐石樓延爲子師有書室爲魁所據人不敢入君入之黃金滿案君不顧而出魁因斂迹徐氏多藏書君借閱幾半始知場屋之外復大有事嘗客龍溪徐令民王九如晨出不返其子疑一怨家投牒屍不得無以成獄令問于君君曰請筮之遇賁之離其爻曰突如其來如焚如死如棄如君曰如者其名也突來而焚

死其屍已焚矣一訊而伏海賊劉香之奸細投宿妓館事覺并捕主人瘐死者數人君曰此濫刑也妓館利客之來奚暇詰所從來乎令然之乃釋其餘崇禎戊寅上行保舉掌院徐蓼莪以君應詔授順天儒學訓導與修會典亡何京師戒嚴君遂南還君嘗曰吾少得事君房而志立長得親石樓而學博晚得交蓼莪而識廣此平生之大概也順治甲午君子宏憲落解君執其手而泣曰予宣和直臣蔣之裔也後世中衰吾祖投筆立功異域失侯鬱鬱而死吾父復還故業三登副榜余亦一登副榜爾今四舉而又落祖孫父子窮經積百年不能起於講堂之上是命也夫其年十月卒七十八歲所著有志林二十卷詩經類疏六卷斷章別義二卷禹貢注一卷

舊史曰余友蔣宏憲志行之士也銜哀貢誠乞余序其三世余讀之神傷不能下筆昔湯臨川序張元長六世謂其數冬而不違一春恆夜而不經一旦宏憲三世得無類是雖然于公謂我治獄多陰德未嘗有所冤子孫必有與者宗信活生靈數萬非治獄可比宏憲且置無悲運數之來會有時也此特爲宏憲言

之耳吾觀胡之幕府周雲淵之易曆何心隱之游俠徐文長沈嘉則之詩文及宗信之遊說皆古振奇人也曠世且不可得豈場屋之功名所敢望哉

張南垣傳

古今之事後起之勝於前者多矣故烹飪起於熱石玉輅基於椎輪卽如畫家有人物有山水漢唐以來梵天帝釋聖主名臣之像皆以繪畫其後稍稍通之而爲塑土範金搏換元劉元欲造嶽廟侍臣像心計久之未措手也適閱祕書圖畫見唐魏徵像豐然曰得之矣非若此莫稱爲相臣者遽走廟中爲之卽日成以此知雕塑之出於畫也然畫師之名者不勝載而塑土之名者一二耳至於山水能妙神逸筆墨之外無所用長未有如人物之變而爲塑者則自近日之張漣始張漣號南垣秀水人學畫於雲閒之某盡得其筆法久之而悟曰畫之皴澀向背獨不可通之爲疊石乎畫之起伏波折獨不可通之爲堆土乎今之爲假山者聚危石架洞壑帶以飛梁轟以高峯據益盜之智以籠岳瀆使入之者如鼠穴蟻垤氣象蹙促此皆不通於畫之故也且人之好山水者其會心

正不在遠於是爲平岡小坂陵阜陂陀然後錯之石繚以短垣翳以密篠若是乎奇峯絕嶂纍纍乎牆外而人或見之也其石脈之所奔注伏而起突而怒犬牙錯互決林莽犯軒楹而不去若似乎處大山之麓截溪斷谷私此數石者爲吾有也方塘石洳易以曲岸迴沙邃闔雕楹改爲青扉白屋樹取其不凋者石取其易致者無地無材隨取隨足或者以平泉爲多事朱勔真笨伯矣當其土山初立頑石方驅尋丈之間多見其落落難合而忽然以數石點綴則全體飛動若相唱和荆浩之自然關同之古淡元章之變化雲林之蕭疎皆可身入其中也漣爲此技既久土石草樹咸能識其性情每創手之日亂石如林或臥或立漣躊躇四顧主峯客脊大壘小礮皆默識於心及役夫受命漣與客方談笑漫應之曰某樹下某石可置某所目不轉視手不再指若金在冶不假斧鑿人以此服其精漣爲人滑稽好舉委巷諧謔以資撫掌梅村新朝起用士紳錢之演傳奇至張石匠伶人以漣在坐改爲李木匠梅村故靳之以扇确几贊曰有竅闕堂一笑漣不答及演至買臣妻認夫買臣唱切莫題起朱字漣亦以扇确

凡曰無竅滿堂爲之愕眙梅村不以爲忤有竅無竅吳中方言也三吳大家名園皆出其手其後東至于越北至于燕請之者無虛日漣有四子皆衣食其業

柳敬亭傳

余讀東京夢華錄武林舊事記當時演史小說者數十人自此以來其姓名不可得聞乃近年共稱柳敬亭之說書柳敬亭者揚之泰州人本姓曹年十五獷悍無賴犯法當死變姓柳之盱眙市中爲人說書已能傾動其市人久之過江雲閒有儒生莫後光見之曰此子機變可使以其技鳴於是謂之曰說書雖小技然必句性情習方俗如優孟搖頭而歌而後可以得志敬亭退而凝神定氣簡練揣摩期月而詣莫生生曰子之說能使人驩哈嗚噓矣又期月生曰子之說能使人慷慨涕泣矣又期月生喟然曰子言未發而哀樂具乎其前使人之性情不能自主蓋進乎技矣由是之揚之杭之金陵名達于縉紳閒華堂旅會閒亭獨坐爭延之使奏其技無不當於心稱善也甯南南下皖帥欲結歡甯南致敬亭于幕府甯南以爲相見之晚使參機密軍中亦不敢以說書目敬亭甯

南不知書所有文檄幕下儒生設意修詞援古證今極力爲之甯南皆不悅而敬亭耳剽口熟從委巷活套中來者無不與甯南意合嘗奉命至金陵是時朝中皆畏甯南聞其使人來莫不傾動加禮宰執以下俱使之南面上坐稱柳將軍敬亭亦無所不安也其市井小人昔與敬亭爾汝者從道旁私語此故吾儕同說書者也今富貴若此亡何國變甯南死敬亭喪失其資略盡貧困如故時始復上街頭理其故業敬亭旣在軍中久其豪猾大俠殺人亡命流離遇合破家失國之事無不身親見之且五方土音鄉俗好尚習見習聞每發一聲使人聞之或如刀劍鐵騎颯然浮空或如風號雨泣烏悲獸駭亡國之恨頓生檀板之聲無色有非莫生之言可盡者矣馬帥鎮松時敬亭亦出入其門下然不過以倡優遇之錢牧齋嘗謂人曰柳敬亭何所優長人曰說書牧齋曰非也其長在尺牘耳蓋敬亭極喜寫書調文別字滿紙故牧齋以此諧之嗟乎甯南身爲大將而以倡優爲腹心其所授攝官皆市井若己者不亡何待乎

偶見梅邨集中張南垣柳敬亭二傳張言其藝而合于道柳言其參甯南軍

事比之魯仲連之排難解紛此等處皆失輕重亦如弇州誌刻文章文與伯虎徵明比擬不倫皆是倒却文章家架子余因改二傳其人本瑣瑣不足道使後生知文章體式耳

李因傳

李因字今生號是菴錢塘人生而韶秀父母使之習詩畫便臻其妙年及笄已知名於時有傳其詠梅詩者一枝留待晚香開海昌葛光祿見之曰吾當爲渠驗此詩讖迎爲副室崇禎初光祿官京師是菴同行禁邸清嚴周旋硯匣夫婦自爲師友奇書名畫古器唐碑相對摩玩舒卷固疑前身之爲清照暇卽發墨作山水或花鳥寫生是菴雅自珍惜然脫手卽便流傳癸未出京至宿遷猝遇兵譁是菴身幃光祿兵子驚其明麗不敢加害光祿自是無仕宦意琴臺花塢風軒月榭絲竹管絃之聲不絕是菴以翰墨潤色其閒當是時虞山有柳如是雲閒有王修微皆以唱隨風雅聞於天下是菴爲之鼎足儋父擔板亦豔爲玉臺佳話亡何海運而徙鋒鏑遷播光祿捐館家道喪失而是菴煢然一身酸心

折骨其發之爲詩尙有三世相韓之痛三十年以來求是庵之畫者愈衆遂爲海昌土宜饋遺中所不可缺之物是庵亦資之以度朝夕而假其畫者同邑遂有四十餘人是庵聞之第此四十餘人之高下不在高第者毋使敗我門庭其殘膏剩馥尙能沾漑如此吾友朱人遠以管夫人比之其宦遊京師同其易代同其工辭章同其翰墨流傳同差不同者晚景之牢落耳余讀文敏魏國夫人之誌誇其遭逢之盛入謁興聖宮皇太后命坐賜食天子命書千文勅玉工磨玉軸送祕書監裝池收藏而是庵方抱故國黍離之感淒楚蘊結長夜佛燈老尼酬對亡國之音與鼓吹之曲共留天壤聲無哀樂要皆靈秀之氣所結集耳人遠傳是菴欲余作傳以兩詩壽老母爲贊有不惜淋漓供筆墨恭隨天女散花來之句老母嘗夢注名玉札爲第四位天女降謫人世故讀是庵之詩而契焉余之爲此者所以代老母之答也

南雷文定前集卷十

珍做宋版印

五宗文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

許崇文定前集卷十

南雷文定前集卷十一

餘姚 黃宗羲 太沖撰

書神宗皇后事

吾始祖萬二府君諱萬河字時通號鶴山其父慶元府通判金人陷慶元不屈死府君避難由慈溪竹墩渡江而南子孫散居餘姚之通德雙雁泉水三鄉雙雁之小聚落有上黃南黃因其姓以各地皆府君之支庶也明初句軍最苦吾黃氏皆改爲王至成化閒宗伯黃珣提學黃韶教諭黃伯川始復本姓先是洪武十九年上黃王蘊充軍入京積功至錦衣衛百戶蘊生教授賢賢生鎮撫杞杞生太學生正生偉歷五世未嘗復姓偉有女喜姐神宗選爲皇后萬曆六年二月英國公張溶冊立大學士張居正奪情副之神宗問后近屬時新建伯王正億方貴盛后欲侈其家世遂以正億對及偉封永年伯餘姚兩伯皆歸王氏於是偉之近屬在上黃者復由黃而改爲王然南黃與上黃相距甚近南昭上穆同告利成而南黃守黃姓如故時某嘗聞大父太僕公言神宗皇后吾黃

氏也往在烏弔上蓬上有司以戚畹表其閭其時以爲疎族不甚詳考今南黃之族來敘其始末且以家譜證之而戚畹之楔綽亦在上黃始知爲鶴山府君之子孫也大父誤紀爲烏蓬耳古來后氏攀援門望忘其宗祊者如唐劉后之笞黃髯叟宋楊后之冒楊次山亦多有之不足爲怪而我黃氏不欲以外戚爲榮父老若不見聞至國亡之後始追數而得其實可慨也夫

四明山九題考甲寅

唐陸魯望皮襲美有四明山唱和分爲九題後之言四明名勝者莫不淵源於是顧四明非九題所得盡而尋九題者又往往不得其處故宋施宿云謝遺塵所稱及陸皮諸詩世雖競傳之顧今四明山中居人乃不知異境果安所在蓋與華山之華陽武陵之桃源皆神仙境可聞而不可卽者也嘉靖閒餘姚岑原道求遺塵九題止得所謂石窗者鄞人沈明臣以大蘭山爲過雲奉化戴洵以杖錫爲石窗皆以意相卜度宜乎其失之遠也余創四明山志與山君木客爭道於二百八十峯之閒而知所謂九題者陸皮未嘗身至止憑遺塵之言鑿空

擬議故在陸皮已不得九題之實後人憑陸皮之詩以求九題其不得遺塵之實又何怪乎余既考其得失每題系以一詩豈能與魯望襲美爭秀然憑虛撫實使好事者無迷山遲響之惑則有閒矣一曰石窗在大俞村自麓至顛十里削成石室高五尺深倍之廣如深而六之中界三石分一室而爲四謝康樂山居賦注云方石四面開窗不知其總在一面也其謂之窗者凡石穴多在平地故稱之爲洞爲室此獨懸空半出有似乎窗也二曰過雲奉化雪竇山有嶺名二十里雲故遺塵云山中有雲不絕者二十里因此嶺而言也三曰雲南在桃花坑山之下其里至今名雲南里陸詩之巴竇越鳥皮詩之無雁到峯前豈可點綴以滇楚事乎四曰雲北蓋雪竇之北也陸詩金庭如有路皮詩應得入金庭金庭在嵯縣是四明之西南言之於雲南差近言之於雲北則懸隔矣五曰鹿亭在大蘭山南史孔祐至行通神隱於四明山有鹿中箭來投祐祐爲之養創愈然後去故于祠宇觀側建鹿亭陸皮不原故事汎稽物態引麝穿竹又何當也皮詩爲在石窗下失其地矣六曰樊榭元曾堅云劉樊從大蘭飛昇建祠

其所祠側爲樊榭皮詩石洞聞人笑大蘭未嘗有石洞也七曰潺湲洞餘姚之白水宮是也天寶閒從大蘭移祠宇觀於此始劉樊居潺湲洞側師事白君因其故居也八曰青櫺子今亦無識之者所謂味極甘而堅不可卒破者按以求之更無一物相似豈草木之種類亦有絕歟陸詩環岡次第生徒虛語耳九曰鞠侯雪竇西十五里爲徐鳧山有鞠侯巖以其象形鑿字名之攢峯割日哀瀑崩雲誠奇地也皮陸以連臂斷腸當之何山無猿而以此私一四明哉有以知其未嘗身至耳

讀葬書問對

或問趙東山葬書問對所謂形氣者對曰形者山阜之象形於金木水火土也氣者山川之脈理或聚或散聚者其生氣也又問所謂方位者對曰以八卦辨龍之貴賤及二十四山之衰旺生剋是也問者曰東山信形氣而斥方位是乎對曰是也然東山不能自持其說耳夫山川之起止合散觀其大略亦不難辨固人人可以顯而得之東山精微其說以爲吉土之遇由於天畀葬師言天命

可改東山言人事難致其害理同也然則其故何也曰鬼蔭之說惑之也問者曰鬼蔭之說非乎程子言父祖子孫同氣彼安則此安彼危則此危亦其理也對曰唯唯否否夫子孫者父祖之分身也吳綱之貌四百年尙類長沙蕭穎士之狀七世猶似鄱陽故嚙指心痛呼吸相通夫人皆然後世至性汨沒墮地以來日遠日疎貨財婚宦經營異意名爲父祖實則路人勉強名義便是階庭玉樹彼生前之氣已不相同而能同之於死後乎子孫猶屬二身人之爪髮托處一身隨氣生長翦爪斷髮痛痒不及則是氣離血肉不能周流至於手足指鼻血肉所成而折臂則足蒿指劓鼻一謝當身卽同木石枯骸活骨不相干涉死者之形骸卽是折臂則足蒿指劓鼻也在生前其氣不能通一身在死後其氣能通子孫之各身乎昔范縝作神滅論謂神卽形也形卽神也形存則神存形謝則神滅難之者謂神與形殊生則合爲一體死則離爲二物二說雖異然要不敢以死者之骨骼爲有靈也後來儒者言斷無以旣盡之氣爲將來之氣者卽神滅之說也釋氏所言人死爲鬼鬼復爲人者卽鬼不滅之論也古今賢聖

之論鬼神生死千言萬語總不出此二家而鬼蔭之說是於二家之外鑿空言死者之骨骼能爲禍福窮通乃是形不滅也其可通乎是以古之先王懸棺之後迎主於廟聚其魂魄以墓中枯骸無所憑依也其祭祖也三日齋七日戒求諸陽求諸陰徬徨淒愴猶不能必祖考精神之聚否今富貴利達之私充滿方寸卽無知之骸骨欲其流通潤澤是神不如形孝子不如俗子也問者曰若是而葬又何必論形氣乎曰不然布席畫階亦有方位筮賓求日豈因利益況乎永托親骸而使五患相侵坐不正席於心安乎程子所謂彼安則此安彼危則此危者據子孫之心而爲言也豈在禍福乎問者曰今世視此若禍福交手而付甯皆狂惑乎曰不觀宋景濂之誌傅守剛乎焚屍沈骨之俗或纓弁之家亦靡然從之不然則以爲辱親也彼之惡擇地猶此之惡焚屍也習俗亦何嘗之有問者曰地苟不吉遷之可乎曰不可焚屍之慘夫人知之入土之屍棺朽骨散拾而置之小櫛其慘不異於焚如也何如安於故土免戮屍之虐乎卽不吉亦不可遷也問者曰形氣旣吉則鬼蔭在其中又何必外之也對曰鬼蔭之說

不破則算計卜度之心起受蔭之遲速房分之偏枯富貴貧賤各有附會形氣之下勢不得不雜以五行衰旺生剋心愈貪而愈昏說愈多而愈亂於是可葬之地少矣誠知鬼蔭之謬則大山長谷迴溪伏嶺之中其高平深厚之地何在無之便是第一等吉壤精微之論不能出此雖有曾楊廖賴亦無所用無俟乎深求遠索無可奈何而歸之天命也問者曰古人凡事筮日東山斥方位而并斥時日何也對曰古之筮日非生剋衝合之謂也時則皆以質明唯昏禮用夜有定期也曾子問見星而行者唯罪人與奔父母之喪者葬以日中可知不然謂之疢患下壙而以宵中今日擇時之害也風和日出版於將事謂之吉日風雨卽是凶日筮者筮此也今之葬者不以雨止擇日之害也故東山之見卓矣

化安寺緣起己酉

化安寺在餘姚通德鄉之剡湖廢於弘治正德閒碑碣無存縣志云化安講寺後唐清泰元年建宋大中祥符九年改賜普圓院宋會稽志云普圓院在餘姚縣南三十五里後唐清泰元年建號化安院大中祥符元年改賜今額然則稱

化安講寺者元以後事也其見於他傳記者宋史陳橐列傳橐字德應餘姚人以權刑部侍郎謝事歸剡中僑寓僧寺日糴以食處之泰然初讀宋史以剡中爲嵯縣及考城冢則云宋侍郎陳橐墓在化安山廬舍遺址猶有存者所謂陳園老梅疆仆尙是數百年以上物始知剡中之卽爲剡湖僑寓僧寺之卽爲化安寺也元虞集狀餘姚州判黃茂云附近有化安永樂二寺府君皆捨田山於僧永爲子孫藏修遊息之資州判者吳艸廬高第弟子予之九世族祖也宋元僖詩集五月十四日過應平仲書塾其夜至明日雨不止有懷藍溪許月山化安真淨源天晴獨跨蹇驢來准擬書堂一宿回野色幾年違白首雨聲半夜落黃梅南山樹對高僧立東浦花隨處士開親舊有懷難晤語出門流水沒蒼苔南洲洽兩軒集有送坦達中住姚江化安詩云深居亦矯俗用世非我期徘徊越壠坂所重遭明時商飈薄江渚蘭蕙幸未衰爲言采芳者何以遺所思宋元僖召修元史博洽爲建文皇帝薙髮皆明初宗匠而真淨源坦達中與之相友其非聊爾人可知由此推之其前其後此寺必多名流勝士不以負販一拂子

爲重輕者其姓名徒付之山高水清而已可不惜哉自先忠端公賜葬化安山
予每遇諸家文集干涉此山者卽抄之以爲故事其所得於寺者僅如此寺廢
雖久把茅而處者不絕其德禮江月某冰懷某皆出而有聞於世予以吾母姚
太夫人之命割地數十畝展其員幅於是佛殿粗具崑山歸莊爰書寺額山門
法堂一切未備然可由是而踵事也夫先州判捨田山于方感之日吾母捨地
於已廢之後何黃氏與茲寺有夙契也嗟乎世之言久遠者無如於佛而感極
之寺院數百年已不能必其如故然猶可諉之成壞之理獨怪自後唐至於有
明歷年不爲不久名流勝士不爲不多不能以鐘鼓之力延其餘響反若因陳
侍郎而有此寺因陳侍郎之寺而有此真淨源坦達中區區之名氏不然姚江
如此寺者何限又孰爲之推尋哉佛氏所謂久遠者果安在耶陳德應倘佯其
先忠端公旁薄於後茲山當與天壤俱敝自此雲水遘止易以垂名幸矣

辯野史

甲子阮大鍼之發難也內外合謀借中書汪文言以興大獄苟文言之獄不解

則楊左魏三公之逮不至乙丑矣故魏忠節書片紙求救於先忠端公云事急矣勿殺義士斯時某年十五接此紙入呈於先公先公卽至金吾劉僑所密計不竟其獄於諸公得無連染未幾金吾以寬文言削籍金吾亦遂委過於先公羣小意忌諸君子中惟先公智勇深沈必爲吾儕患其後惠公元孺爰書詭行頗僻之劉宗周狠心辣手之黃某意指此一事也乙丑冬訛言繁興謂三吳諸君子謀翻局先公用李實爲張永以誅逆奄逆奄聞之大懼刺事至江南四輩漫無影響刑部侍郎沈演欲自以爲功奏記逆奄曰事有跡矣逆奄使人曰譙訶李實取其印信空本填七君子姓名云俱係吳地縉紳盡是東林邪黨蓋因訛言起於吳地而不知先公實越人也先公三疏劾奄雖爲其所恨然非訛言則禍亦不若是之酷非解文言之獄以救楊左魏三公爲羣小所喪膽則亦無此訛言也近見王嶽清流摘鏡謂李實睚眦於逆奄先公實欲收逆奄之功而不避形迹則是呆人說夢矣此時官府惟知一逆奄以王安之植根深固不能保其腰領區區疎遠之李實虔奉其意指且不暇而使之別生事端愚者所不

出矣逆奄與羣小朝夕所計慮者翻局二字終逆奄之世無人敢萌此意而羣小自爲風鶴者則有二節其一甲子十一月孫高陽行邊至薊欲入覲羣小奔告於逆奄曰此晉陽之舉戶部侍郎李邦華召之也其一則訛言先公用李實事也近日孫徵君鍾元墓志言楊左下獄高陽欲與晉陽之甲以救之楊左已故而止移甲子十一月之事於乙丑七月謂高陽實有其事猶王嶽謂先公實有其事也逆奄之亂去今五十餘年耳目相接其大者已牴牾如此向後欲憑紙上之語三寫成烏豈復有實事哉

祭萬悔菴文

嗟乎十年以來余之風波禍患苦無已時然一歲之閒非先生過我則我過先生必且再三一雪其心之所甚痛竹燈木榻卽啖野葛之味亦足樂也自先生出門余死一兒一孫兩媳刊章名捕幾陷穴胸焚巢之禍我謂旦中悔菴粵中將至必有名香佳硯出而相玩吾二三年閒所歷之苦縷翻於前泫然絜袂相對庶幾可以忘矣豈知風波之民卽此一日之絜袂相對者天亦不欲以假之

乎余之交先生與文虎蓋在壬申之歲也當是時東林復社爭相依附予所居僻遠城市亦不乏四方之客喪亂之后其跡如掃瑞當嘗曰文虎云亡百里之內自履安而外誰復窺黃氏之藩籬者晚潮落日孤篷入港雖里媪孺兒亦知其爲先生訪余兄弟之舟也吾老母癸酉四旬癸未五旬先生與文虎皆如期而至癸巳六旬先生揭揭度阡陌閒坐定出所作正氣堂壽讌序讀之傷文虎之不偕不覺失聲而哭先生又去三十年登堂拜母之客一朝盡矣先生以乙未十一月二十日別我聞訃亦在是日余之別文虎也乙酉十月十日其聞訃也丙戌十月十日豈數之偶合與抑吾二三兄弟至情之所感召乎去年四月夢先生與文虎躋仲過我因作詩紀之遂爲懸讖則不可不謂感召之所至也嗟乎先生名思陵孝廉二十又二年飢寒流落關係晦明夫復何憾而先生會謂人曰吾一入長安則竹橋劍中之路豈可復過先生之不以竹橋劍中易長安者則欲與吾兄弟共此飢寒流落斯言歷然甯可銷磨皇天后土旣屬無情後死之痛顧影彌深先生其必悽愴於我詞也夫

避地賦

嗟我生之不辰兮逢家難於髫年蘭芽之方茁兮霜雪從而萎焉覆巢無完卵
兮羌變姓於傭保之閒幸先皇之御歷兮大憝授首而鯨鯢之維時哭祭於闕
下兮醢奸骨以爲犧先皇登萬歲山而見之兮曰此忠死之孤兒也雖紅日之
照融兮實魑魅之繁徒宦奄人而歸來兮孰不注東林以僕姑烏聲慘爲車載
板兮獸幻而爲山都余反首芟舍兮念門戶之榛蕪啓藝苑之春華兮收儒林
之秋實竊自比於管樂兮甯寔斂乎藪萐夫名教之利刃兮固不便乎腐朽者
之風逸遂狺狺罵爲黨人兮禍復叢夫俊及彼兩京之顛覆兮曾不償孔壬之
恩讎我亦何罪何辜兮竊獨懼此橫流朝不坐宴不與兮私天下爲一家之憂
榜朝堂而名捕兮圍門閭以戈矛待變熊蟠之熟兮寄命日影之留令無伏牀
之泣兮友鮮複壁之收而乃避地於□□兮觀日月之出沒經亂礁之岑崿兮
想文山之竭蹶草木無所附麗兮但見饑鷹千羣之倏忽泊牡蠣之灘頭兮昔
光堯於是乎至止數百年若旦暮兮誠流涕而不能已彼琴墮有還時兮今庶

幾其復爾儼佛像於□田兮遙千里而見之歷以中土之耳目兮祇菟瑣而自
疑鳧雁啞呷於鴻波兮島嶼之逶迤也熠燿明滅於紅窗兮星宿之推移也何
馬蘭之弱草兮數十尺而扶疎行者往來其下兮每墮蕊之紛如瑞香亦五色
兮與荼靡而閒諸凡島中之花鳥兮視人世而竟殊當夫百妖露天水同羣魚
飛霧海市當空帆俄頃而千里兮浪百仞而萬重縱一瀉之所如今何天地之
不通越長岐與薩師瑪兮乃□□天□□方銷兵而忘戰兮粉飾乎隆平招商
人以書舶兮七錄韡於東京金石古奇器兮比戶能辨其真贋華堂隔以綾幔
兮月夜而箏琶笙管之齊鳴余既惡其侈怵兮日者亦言帝殺夫青龍甲乙帝
殺青龍
不可東行
見墨子返余旆而西行兮胡爲乎□中而那避地於萬山兮目視夫霄漢絕
村落之烟火兮支土鏗于巖畔接十尋之瀑布兮使受役於城旦查黎瑣碎於
秋林兮丹合嫵媚於春澗與猿鳥而爭食兮偕樵蘇而相亂當夫寒食之時青
松散粉兮黃霧彌天杜鵑環岡兮紅霞匝地復有苦鳥鳴夜兮林花莫不爲之
憔悴處處哭聲朝朝喪槿抱膝而歌蒿里兮墓林紙錢又乘颿而突戾嚴霜倒

飛白髮孤燈不轉水樂但聞鳥更將放筆而就寢兮開戶視夫中星斯時高岡
之甍下兮似老人且欬而且行旋繼之以猛虎兮風颯颯而屋瓦不甯習既久
而不怪兮反有以助余之淒清而其雪合空山兮黃獨無苗梅花有骨木客之
跡無數兮樵人之徑皆沒誰謂莫往莫來兮亦有麋鹿之搪揆甘露降於寒松
兮映初日之明熒茲馨烈之鬯達兮豈等級於醪醕限之以一垣兮凝至和於
中庭亦有高人訪道至我廬邊古松流水算子鏗然悲屠龍之技兮僅世外之
可傳蓋將埋名與草腐兮不虞爲野火之所妒以淵明之苦節兮天亦不憐其

遲暮

陶有遇
火詩

沉余之瑣瑣兮又焉能免夫孤露悲藥圃之就荒兮聽流水之侵

路彷徨依齋之易卦兮聊避地於市廛求昔時之屠狗兮遊酒人以亡年釋亡命
之疑兮因避地於城郭守不見諸侯之介兮齊咎譽之寂寞最此二十年兮無
年不避避不一地念遷播之未定兮老冉冉其已至於是返故居撻六枳蓬蒿
滿琴書肆苟歌哭之有常兮豈怨風雨之不蔽尋松陽湖之蹟兮按黃竹浦之
記放翁稱夫蜀山兮九靈發其藍水二蘭絕江可望兮雙瀑舉足可企何墜簡

之紛如兮留久湮之祕圈鷄牧豕其閒兮不辭爲鄉里之所鄙詎料龍蛇起陸
兮百毒一時而匯蚍蜉直欲撼大樹兮蜂蟄亦結而成隊僕區之法亡兮桑梓
滌而無類未十年而又避地兮奉老母而竄於海隅累故書之千篋兮歎家具
之一車襁女孫之三孩兮因世亂而憐渠一室分爲庖湍井臼兮盈丈而共雞
犬圖書談文正之遺事兮猶彷彿乎牛屯九亭石屋之延連兮昔汝湖之所園
也羌獨不得際於斯時兮甯功名之足論遊東山之古寺兮悵亡宋之哭聲
宋
亡
邑之士人衰
衣聚哭此寺
歷千載而不散兮悲天運之復丁東觀□□兮曾中流而擊楫挽
墜日於虞淵兮恨此志之未捷雖同舟之已盡兮而老兵退卒或留於灰劫相
與指點殘陽之下兮無異尋乎夢中之蝶蓋聞承平之父老兮終身不見夫兵
革獨喪亂之於余兮前未往而後復迫疲曳而不免避地兮尙遑遑其何適亂
曰探野葛以爲糧飲之以鵠血兮結蓼花以爲佩美人復貽予以苦蘗兮彼桃
李之豔陽阻風波而莫適兮苟前身之不爽又何庸厭射兮

雁來紅賦

溽暑初謝秋聲在樹寸寸寒烟山山靈雨水潺湲而無極天寥泬而如暮嘹唳
兮聲滿長空參差兮景留古渡蕙蘭心死芙蓉腸斷草則螢去情亡葉乃根離
恨絆爰有弱草生於階畔根老無花條孤不蔓埋落蘚所不辭招菟陸以爲伴
於斯時也忽然露奇遂爾目換黃疑曉鶯坐樹紅若春鶻哭且蜀錦出濯霞光
方亂幾登羣卉之目豈特百草之冠兒子百家進曰天下之物無大小未有不
得一暢發其精華者也彼草木之甚微或花或葉必蒙一時之咨嗟況夫魁梧
長者而有終身于風沙奈何不能安靜待時急流俗之誼譁余乃喟然歎曰汝
以其妖光奪目冶色欺人乃精華之得發耶方其雲慘慘而欲凝月黯黯而將
壓莫訴霜饕誰憐雨劫雜粉染于淒露酸心幻爲媚葉秋風宛轉原是哀魂夕
陽陸離但有啼頰相對吟蟲時來病蝶豈知其所不得已者人反賞之以目睫
乎小子識之君子聞道而腴心空得第奚羨榮枯于外境達人苦富貴之桎梏
世方以爲慶修士傷聲名之頓撼世方以爲盛又何殊于茲草之萎泔將敗女
方以爲得遂其性乎故曰木有癭石有暈犀有通以取妍于人皆物之病也

海市賦

余登達蓬山望海山僧四五人皆言春夏之交此地特多海市各舉所見與圖畫傳聞者絕異蓋傳聞者多言蜃氣燭天影象見於空中豈知附麗水面以呈譎詭言者不出雲氣髣髴豈知五采歷落刻露秋毫東坡在登州以歲晚得見爲奇然霜曉霧後往往遇之亦不必拘拘於春夏也信耳信目自有差等山僧約明年三四月來宿其舍海神當不棄棄先次第其言而賦之

己酉之冬觀海達蓬山僧四五指點空濛曰濱海之地不一茲獨當夫神宮也光怪發作亦何人而不逢但稱登州之海市者蓋不免於瞽聾余曰各言其狀本源曰其爲城也雉堞崔嵬麗譙曄曄三里七里句股可攝於焉戎馬乘城蹀躞照白竊驪兩鬣風鬣儼烽火之告嚴危黑雲之將壓其爲樓也蹇產百尺成以鬼巧綺窗朱瑣明星縈繞神妃雜遝凭闌渺渺其語可聞若在粧曉有時而現爲黃幄深簷婀娜繡帶悠揚何采旄桂旗之盡屏茲特疊出以爲章汪道者曰亦有單門聚落忽然而來屋瓦參差門戶洞開嗟朝煙之不起豈井臼之生

埃固職方所不紀亦戰爭所不災續宗曰當旭日之初高有霜鐘之寓質制宏
萬石音諧七律藏寂寞之元聲雖滿盈而不出少焉變爲城郭中引長橋值刺
史之行部或中丞之入朝鳴笳列騶夾轂喧囂何珠宮貝闕而以鹵簿宣驕其
後幻爲染肆綠沈紅淺羅綺繽紛借霞天以爲色蒸香草而成文彼蜀江之濯
錦信天人之攸分補陀僧曰橘柚初黃颯然風葉覽觀大洋湧起寶塔四面句
欄七重鞚鞞華矚風濤光交目睫遇其變現狀若鸚螺瑣碎末品大越邱坡閃
屍之下湛然水波若夫海路壯闊一山千里雖人跡所不交亦針經之能指爾
乃帆席未掛僧窗宴啓忽然叢島逼塞孤峯魁峙疑異國之飛來豈靈居之遷
徙當其電絕不煩蟒晷名曰浮山海人習此或曰此何理也余曰夫積塊之閒
紅塵機巧菁華銷鑠猶且羣羊飛鳥野馬磅礴彼大海空靈神明郭廓百色妖
露豈能牢落故其軒豁呈露者窮奇極變而無有齷齪此固蛟龍之所不得專
天吳蜃像之所不能作況蜃之爲物甚微吐氣更薄乎南海謂之浮山東海謂
之海市是乃方言之託也

南雷文定前集卷十一

Faint vertical text columns, likely bleed-through from the reverse side of the page. The text is largely illegible due to fading and low contrast.

南雷文定後集目錄

卷一

明名臣言行錄序

先師戡山先生文集序

寒邨詩稿序

山翁禪師文集序

沈昭子耿巖草序

姜山啓詩序

靳熊封詩序

萬祖繩七十壽序

重建先忠端公祠堂記

永樂寺碑記

小園記

答萬貞一論明史曆志書

卷二

大學士碩膚孫公墓誌銘

兵部左侍郎蒼水張公墓誌銘缺俟補入

大學士文靖朱公墓誌銘缺俟補入

謝時符墓誌銘

朱止谿墓誌銘

鄧起西墓誌銘

顧麟士墓誌銘

顧玉書墓誌銘

參議礎礎閣公神道碑銘

卷三

贈編修弁玉吳君墓誌銘

雪叢閔君墓誌銘

謝時裡墓誌銘

封庶常陳君墓誌銘

參政籲之邱公墓碑

陳乾初墓誌銘

編修陳怡庭墓誌銘

提學來菴袁公墓誌銘

周子佩墓誌銘

陳夔獻墓誌銘

卷四

張仁菴墓誌銘

徐瘦菴墓誌銘

毛淇僊墓誌銘

姜夫人墓誌銘

錢忠介公傳

陳令升先生傳

職方司郎中大垣靳公傳

戴郁山傳

書錢美恭尋親事

施恭愍立後議

姚江春社賦

南雷文定後集目錄

南雷文定後集卷一

餘姚 黃宗羲 太沖撰

明名臣言行錄序

史之爲體有編年有列傳言行錄固列傳之體也列傳善善惡惡而言行錄善善之意長若是乎恕矣然非皎潔當年一言一行足爲衣冠之準的者無自而入焉則比之列傳爲尤嚴也今徐子之爲是錄也博採兼取一善之長必錄無暇窺見至隱以朱子之嚴尙有議其范平章竇內翰之不應入者徐子毋乃長於知君子而短於知小人乎雖然徐子之意固有在也徐子身逢喪亂顧當世愚儒無知不足以備一鄣瑣瑣朱墨徒供全軀保妻子之用世智限心風塵破膽田僮竈婦且窺其底裏何況盜賊是故守尾生孝己之信於盜賊而施張儀蘇秦之詐於君父破城陷邑智窮不能自免則以亡鹵降人爲究竟遂使天網毀紊地紐凋絕普天相顧命懸晷刻嗟乎顧安得事功節義之士而與之一障江河之下乎古之君子有死天下之心而後能成天下之事有成天下之心而

後能死天下之事事功節義理無二致今之君子以偷生之心行嘗試之事亦安有不敗乎徐子是錄大約不出於事功節義二者其閒事功有大小節義有勇怯亦視其本領之闊狹有盡有不盡耳要不可爲無與於此者也以是求之顧亦未嘗不嚴也夫事功必本於道德節義必原於性命離事功以言道德考亭終無以折永康之論賤守節而言中庸孟堅究不能逃蔚宗之譏三百年來堂陛之崇巖城邑之生聚邊鄙之干陬至於末造清議不衰明之爲治未嘗遜於漢唐也則明之人物其不遜於漢唐明矣其不及三代之英者君亢臣卑動以法制束縛其手足蓋有才而不能盡也徐子亦嘗尙論其故乎近時僞書流行聊舉一二如甲申之死則雜以倅戮如陳純德等逆閹之難則雜以牖死如丁乾學等楊嗣昌喪師誤國冬心詩頌其功勞洪承疇結怨秦人綏寇紀張其撻伐高官美謚子姓私加野抄地志纖兒信筆此錄出庶幾收廓清之功矣

先師戴山先生文集序

先師之學在慎獨從來以慎獨爲宗旨者多矣或識認本體而墮於恍惚或依

傍獨知而力於動念唯先師體當喜怒哀樂一氣之通復不假品節限制而中和之德自然流行於日用動靜之間獨體如是猶天以一氣進退平分四時溫涼寒燠不爽其則一歲如此萬古如此卽有愆陽伏陰釀爲災祥之數而終不易造化之大常慎者慎此而已故其爲說不能不與儒先牴牾先儒曰意者心之所發師以爲心之所存人心徑寸閒空中四達有太虛之象虛故生靈靈生覺覺有主是曰意不然大學以所發先所存中庸以致和爲致中其病一也然泰州王棟已言之矣自身之主宰而言謂之心自心之主宰而言謂之意心則虛靈而善變意有定向而中涵意是心之主宰以其寂然不動之處單單有箇不慮而知之靈體自做主張自裁生化故舉而名之曰獨少閒攙以見聞才識之能情感利害之便則是有商量倚靠不得謂之獨矣若云心之所發教人審幾於動念之初念旣動矣誠之奚及師未嘗見泰州之書至理所在不謀而合也先儒曰未發爲性已發爲情孟子之惻隱羞惡辭讓是非因所發之情而見所存之性因所情之善而見所性之善師以爲指情言性非因情見性也卽心

言性非離心言善也形而上者謂之道形而下者謂之器器在斯道在離器而道不可見必若求之惻隱羞惡辭讓是非之前幾何而不心行路絕言語道斷所謂有物先天地者不爲二氏之歸乎又言性學不明只爲將此理另作一物看如鐘虛則鳴妄意別有一物主所以鳴者夫盈天地闕止有氣質之性更無義理之性謂有義理之性不落於氣質者臧三耳之說也師於千古不決之疑一旦拈出使人冰融霧釋而彌近理而大亂真者亦旣如粉墨之不可掩矣昔者陽明之良知與晦翁之格物相參差學者駭之羅整菴霍渭崖顧東橋斷斷如也然一時從遊者皆振古人豪卒能明其師說而與晦翁並垂天壤先師丁改革之際其高第弟子如金伯玉吳磊齋祁世培章格菴葉潤山彭期生王元趾祝開美一輩旣已身殉國難皋比凝塵曩日之旅進者才識多下當伯繩輯遺書之時其言有與雒閩齟齬者相與移書請刪削之若惟恐先師失言爲後來所指摘嗟乎多見其不知量也此如成周王會赤奕陰羽菴幣獻書而使三家學究定其綿叢耳昔和靖得朱光庭所抄程子語以質程子程子曰某在何

必讀此書若不得某之心所記者徒彼意耳和靖自是不敢復讀古之門人不
敢以燭火之光雜於太陽今之門人乃欲以天漢之水就其蹄涔不亦異乎王
顥菴先生視學兩浙以天下不得覩先師之大全爲恨捐俸刻之東浙門人之
在者義與董瑒姜希轍三人耳於是依伯繩原本取其家藏底草逐一校勘有
數本不同者必以手蹟爲據不敢不慎也高忠憲云薛文清呂涇野語錄中皆
無甚透悟有之無所增損也讀先師之集當有待之而興者矣顥菴先生之惠
後學豈小哉

沈昭子耿巖草序

昔在嵒太守淑子署中一時名士刻其詩文者咸盡其底蘊最後得鎮海樓碑
讀之因謂淑子曰此韓陵山一片石也徐渭不得孤行矣自是始知有先生姓
名後三年邂逅先生於許使君座上目之曰此作鎮海樓碑者然是時先生不
及文章而談理學又數年再見先生先生亦不及文章而談史學余於是知先
生之文章本之經以窮其原參之史以究其委不欲如今人刻畫於篇章字句

之闕求其形似而已宋景濂論文謂漢唐二三儒者其於文或得皮膚骨骼獨
宋室學統數先生得文之精髓而爲六經孔孟之文先生論文謂學統數先生
於天人性命經制度數之說固窮其源而抉其幽誠非漢唐儒者之文所及若
就文章之能事而衡之以質文終始之變則漢唐儒者蓋有專長以相勝其爲
論不同如此余近讀宋元文集數百家則兩說似乎有所未盡夫考亭象山伯
恭鶴山西山勉齋魯齋仁山靜修草廬非所謂承學統者耶以文而論之則皆
有史漢之精神包舉其內其他歐蘇以下王介甫劉貢父之經義陳同甫之事
功陳君舉唐說齋之典制其文如江河大小畢舉皆學海之川流也其所謂文
章家者宋初之盛柳仲塗穆伯長蘇子美尹師魯石守道淵源最遠非汎然成
家者也蘇門之盛凌厲見於筆墨者皆經術之波瀾也晚宋二派江左爲葉水
心江右爲劉須溪宗葉者以秀峻爲揣摩宗劉者以清梗爲句讀莫非微言大
義之散殊元文之盛者北則姚牧菴虞道園蓋得乎江漢之傳南則黃潛卿柳
道傳吳禮部蓋出於僊華之窟由此而言則承學統者未有不善於文彼文之

行遠者未有不本於學明矣降而失傳言理學者懼辭工而勝理則必直致近
譬言文章者以修詞爲務則甯失諸理而曰理學興而文藝絕嗚呼亦冤矣余
老屏空山先生不鄙而屬定其文余卒卷而歎曰當元之修遼金宋史也其史
官最著名者歐陽元揭傒斯張養浩宋褫蘇天爵今之修明史其史官最著名
者亦不數人先生其眉目也先生之文清深整雅畜而始發閱事摹畫而隅角
不露何其似蘇伯修也先生之修明史議與伯修之三史質疑同也先生之開
濬杭州支河運河碑記與伯修之江浙行省浚治杭州河渠記又同也其他金
石之文扶植名教無弗同者伯修爲靜修再傳則知先生之文出於學統無疑
矣

寒邨詩稿序

寒邨之詩出人皆笑之卽知之者亦謂其在江門定山之閒而不喜之以其不
似唐也余以爲惟寒邨始可以言唐詩矣似不似之論所以去之更遠古今之
言詩者多不從受病之處徒抄販其流注之害此其說之所以愈長也近時疏

敕諸家莫如牧齋然知白沙之爲詩人而深怪定山猶是執呂以毀律也痛惡者竟陵稍寬者公安夫竟陵公安豈能自別爲家竟陵學王孟而失之者也公安學元白而失之者也根孤伎薄不過流注之害耳詩之爲道從性情而出性情之中海涵地負古人不能盡其變化學者無從窺其隅轍此處受病則注目抽心無所絕港而徒聲響字脚之假借曰此爲風雅正宗曰此爲一支半解非愚則妄矣上天下地曰宇古往今來曰宙自有此字便不能不宙今以其性情下徇家數是以宙滅宇也又障其往來者而使之索是非於黃塵是以宙滅宙也今人論詩大概如是寒邨之性情滄汰秋水表裏霜雪故其爲詩不必泥唐而自與唐合有識者自當相遇於心理所得則余言亦贅矣

山翁禪師文集序

歲乙酉余遊雲門諸寺至平陽山翁開山經始坐未定卽出其文集六冊屬刪爲四冊入夜秉燭相對閱數卷而止未卒業也壬戌余復至平陽時天岳繼席出其先師所謂百城集者命刪之以終前諾明年天岳詣余於黃竹申之以幣

老嬾因循忽忽三年頃見直木堂詩經久胡不報綠樹灌鶻鷄是責余之爽約
也有自山曉來者亦以爲言夏月北窗蜀山青翠勉爲削筆旣而嘆曰世無文
章也久矣而釋氏爲尤甚釋氏以不立文字爲教人亦不以文章家法度律之
故今日釋氏之文大約以市井常談兔園四六支那剩語三者和會而成相望
於黃茅白葦之閒以爲甕中天地章亥之所不步也讀之者亦不審解與不解
疑其有教外微言落於麤野之中蟬螻在東莫之敢指嗟乎言之不文不能行
遠夫無言則已旣已有言則未有不雅馴者彼佛經祖錄皆極文章之變化卽
如楞嚴之敘十八天五受陰五妄想與莊子之天下司馬談之六家指要同一
機軸蘇子瞻之温公神道碑且學華嚴之隨地湧出皎然學於韋蘇州覺範學
於蘇子瞻夢觀學於楊鐵崖夢堂學於胡長孺其以文名於一代者無不受學
於當世之大儒故學術雖異其於文章無不同也奈何降爲今之臭腐乎雖然
亦儒者有以開之也明初以文章作佛事者無過宋景濂其爲高僧塔銘多入
機鋒問答雅俗相亂試觀六朝至於南宋碑釋氏者皆無此法虞伯生尙謹守

之至景濂而一變堤決川奔則又何所不至也山翁之詩文亦不免於堆垛妝點然稱情而出當其意之所之前無古人後無來者既不顧人之所是人之所非并不顧己之所是所非喜笑怒罵皆文心之汎濫如是則於文章家之法度自有不期合而合者奚有於習染之淺淺者乎山翁之弟子山曉天岳皆覺範圍至之亞也視余此刪當有憬然會於心矣

姜山啓彭山詩稿序

天下皆知宗唐詩余以爲善學唐者唯宋顧唐詩之體不一白體崑體晚唐體白體如李文正徐常侍兄弟王元之王漢謀崑體則楊劉之西崑出於義山二宋張乖崖錢僖公丁崖州其亞也晚唐體則九僧寇萊公魯三交林和靖魏仲先父子潘逍遙趙清獻之輩凡數十家至葉水心四靈而大振少陵體則黃雙井尚尚之流而爲豫章詩派乃宋詩之淵藪號爲獨盛歐梅得體於太白昌黎王半山楊誠齋得體於唐絕晚唐之中出於自然不落纖巧凡近者卽王輞川孟襄陽之體也雖鹹酸嗜好之不同要必心遊萬仞瀝液羣言上下於數千年

之閒始成其爲一家之學故曰善學唐者唯宋明初以來九靈鐵崖岳鳴眉菴之餘論未泯北地起而盡行抹掇以少陵爲獨得撥置神理襲其語言事料而像之少陵之所謂詩律細者一變爲麤材歷下太倉相繼而起遂使天下之爲詩者名爲宗唐實禘何而郊李祖李而宗王然學問稍有原本者亦莫不厭之百年以來水落石出而臥子猶吹其寒火顧見絀於艾千子陽距而陰從自後詩文稍刊其脂粉而爲學未成天下不以名家許之其閒公安欲變之以元白竟陵欲變之以晚唐虞山求少陵於排比之際皆其形似可謂之不善學唐者矣吾越自來不爲時風衆勢所染當何李創爲唐詩之時陽明與之更唱迭和未幾棄去何李而下嘆惜其未成不知其心鄙之也太倉之執牛耳海內無不受其牢籠心知徐渭楊珂之才而欲招之徐楊皆不屑就太倉遂肆其譏彈而徐楊之名終不可掩顧昧者以鄉邑二十年之聞見妄謂吾越無詩越非無詩也無今日之假唐詩也又何異飲狂泉者之怪國君穿井而汲乎山啓淵源家學其述祖德詩駸駸入於大雅應酬登臨之作自有王謝氣象以之名世不難

也昔陳後山答秦少章書謂於詩初無師法少好之積以千計及一見黃豫章盡焚其稿而學焉故後山之詩斷自三十一歲以後夫後山三十歲以前詩亦超軼精詣矣後山何爲而去之山啓年未三十其進當未有量余故以學詩之源流告之使不爲時風衆勢所惑也

靳熊封詩序

從來豪傑之精神不能無所寓老莊之道德申韓之刑名左遷之史鄭服之經韓歐之文李杜之詩下至師曠之音聲郭守敬之律曆王實甫關漢卿之院本皆其一生之精神所寓也苟不得其所寓則若龍攀虎跛壯士囚縛擁勇鬱遏塗憤激訐溢而四出天地爲之動色而況於其他乎靳使君天才飄發少攻舉子業拘於例不得就試其胸停書史無所發洩乃一寓之於詩故其爲詩富豔精工仍不失平淡清夷之骨將使寒郊發幽鬼賀破咽而又礪之以新安之山水元英虛谷之詩蹟次第摸索蓋駸駸乎而未有已也百年之中詩凡三變有北地歷下之唐以聲調爲鼓吹有公安竟陵之唐以淺率幽深爲祕笈有虞山

之唐以排比爲波瀾雖各有所得而欲使天下之精神聚之於一塗是使詐僞百出止留其膚受耳使君未嘗循一家之門戶時而律呂相宣則豫章失其派時而言近指遠則王孟闕其牖時而行空角險則北征南山啓其塗其精神所注如決水於江河淮海衝砥柱絕呂梁因其所遇而變生焉方今禮樂將興其作爲雅頌以鳴一代之盛者舍使君其誰適歟

萬祖繩七十壽序

萬貞一從京師致書屢以其家先生壽序爲請夫京師文章之淵藪也顧沾沾一老生之言何足爲重輕豈以其久故歟壬申之冬余始交文虎履安兩先生是時祖繩年十六讀書西皋蓋所謂翠竹碧梧鸞鶴停峙者也從錢忠介學制藝稱爲高第弟子場屋氣習不用力古作而更竄易於時文不訂經史本處而求故事於時文祖繩求理於大全求法於大家原原本本當時未之或先也逮更喪亂此志不衰旌旗亂野飛火壓城人方竄針孔以自匿而祖繩書聲琅琅猶出戶外人以此笑之此一時也馳驅南北蕭然四壁讀書更萬卷無一字用

乃從道士郎堯生學老氏法久之自詫有得蒙存淺達誠不如參同悟真之有倫脊矣又一時也令子貞一聘入史館彌綸一代一時同被徵者出入靡定而貞一八年不調專董其事天下皆知有萬氏之學嘗讀宋景濂集當時所聘修元史者極天下之選飲酒賦詩視之如在天上而景濂之父蓉峯處士一時名公皆有詩祝誦今日祖繩卽異時之蓉峯處士也人生文字之榮得此足矣萬氏之門文章風教爲衣冠瞻矚又一時也祖繩亦思七十年來變燧迴星不過俄頃而所歷流變如此去歲過逸老堂余所選文集祖繩抄之等身余篋中墜落反從祖繩抄之祖繩之好學不因所歷爲流變萬氏詩書之澤當方長而未艾也

重建先忠端公祠堂記

天子旣誅逆奄表死節之忠臣祭葬贈蔭卹典咸備御史袁鯨請於京城建祠一座以慰忠魂楊漣周順昌黃家諱李應昇等各家子弟追塑遺像於祠中順天府春秋祭享詔曰可於是死節最著者十三家有司奉旨立廟於鄉皆名曰

敕建先忠端公祠卜地邑西之西石山爲呂氏書室有長松峭壁用官價百金

買之是時我鄉奄黨最多而以逆案拾遺歸者北科糾拾某官癸亥京察降級乙丑以後遂爾登級光祿無匠

何以冒殿工而加級非夤緣捷徑何以越歲而正位奉常內有通天之孫杰外有納賄之崔逆同郡劉宗周正人也惟恐出而阻之移宮一案何罪乎疏請榜

示以爲戒勢尤桀驁與其同黨蹴私人出而爭地東浙士大夫皆爲之不平馮留僊

馮鄴僊劉瑞當陸文虎萬履安馮元度會祭祠下其文刺我邑縉紳不復知人

閒有羞恥事而以黨奄自旌也奄黨憤甚又使其前爲方從哲之門客狐鼠遊

說爲一邑風水攸關必須改卜戴山劉先生爲書以告當事曰不佞白安先生

之未亡友也請以螭臂當之矣久之而後定而同黨亦知爲拾遺者所誤咋舌

而死紹興推官陳子龍銘其麗牲之石春秋常祭之外巡按蕭奕輔喬可聘左

光先海道許彥儀部周鑣等路有經由者皆以特羊告廟賦詩憑弔改革之際

羣盜滿山官兵借爲營房抽椽壞壁未幾而傾覆矣有司致祭無所罷享者四

十年創痛如積 今天子纂修明史追數明室之亡在於天啓昔伍員之諫夫

差也謂二十年之後吳其爲沼當員之諫時爲魯哀公元年至二十二年其言

始驗而越滅吳先公之諫熹宗爲甲子歲至乙酉而明亡亦二十二年故先公絕命詩錢塘有浪胥門目不特痛其遭遇如員而於國家興亡之數亦前知之矣魄感精動虛塵可數當知緯候爲小道耳王顓菴先生督學浙中以仁義束世教行部東浙表章啓禎忠節立六賢講院而以先忠端公爲首又考圖經知先忠端公故有祠宇今雖蕪廢顧先朝敕建不可不復乃卽其故里老屋三楹肖像存舊丙寅二月下丁教諭沈君煜將事風和日美俎豆靜潔故老見之泣下沾襟蓋先公被逮在丙寅三月今歲復在丙寅而祀典之舉適相邂逅不可爲非數也祠堂當三江之口元柳貫有連延黃竹浦之詩剡水西流藍溪南注姚江東去至此而合迺易之戴九靈之遺蹟在焉北望陸放翁之蜀山南觀李信之雙瀑各山大川藥房蕙帳於此乎於彼乎徬徨上下死而不亡者庶幾其或遇之

永樂寺碑記

去余居六七里而近有龍山永樂寺大江橫其東蜀山峙其右迺易之所謂姚

江東去蜀山青之地也蜀山者陸放翁入蜀記云興國軍富池有小石山自頂直削去半與餘姚江濱之蜀山絕相類者卽此幽潛奇特爲山水勝處淳祐閒鐵崖禪師志先與其徒士懷寶潛建報慈菴景定請於朝賜名永樂寺卒皆塔於寺之東偏後四年曾孫時敏景星蘊玉復補所未備鐵崖與丞相史嵩之友時敏嗣法佛鑿範一時飽參久證咸來依止咸淳七年八月庚寅立碑於寺傳至正宗匡當元至元己卯正宗能文好客建水竹居日吟咏其中初正宗主龍興之上藍金華柳道傳提舉江西儒學暇日過從甚相好也後二三年道傳受代還里而正宗亦謝事歸龍山道傳自金華扁舟訪之宿留是山幾一載相對賦詩其見集中者古詩二律詩五七言各一其律詩連延黃竹浦隱見白龍堆指余所居之地名也詩皆刻石篆三大字於堂臨別著龍山古蹟記一卷道傳之門人戴九靈避地慈谿之花嶼鳳湖其於寺棲止尤數而詩亦最多懷舊維故句甚悲涼正宗再傳爲天甯禪師仲猷闡明太祖以高行僧召至南京尋奉旨使日本畢事歸奏詔許歸隱山中當其使日本也太祖及宋景濂皆有詩送

之仲猷建歸菴於寺左蓋以得歸爲幸仲猷善鼓琴又建二蘭齋其記之者卽九靈也洪武乙卯滑伯仁宋無逸登其山巔滑詩有登臨重九日感慨百年心之句正德癸酉陽明先生與王世瑞許半圭蔡希顏朱守中徐曰仁流連信宿賦詩於此曰仁因記其事茲山窮鄉僻壤自淳祐至正德數百年閒而名蹟之夥如此乃不知廢於何時萬曆庚申西緒纘重建佛殿老屋數閒支撐於盲風苦雨之中香燭無主雲水莫視德如行過而憫之軍持不借蕭然露宿苦力三年屨笠雲委聿興工作穹殿中峙軒廡回旋有齋寢以安禪寂有門闔以謹啓閉有方丈之室有香積之廚魚鼓鐘磬牀第臥具凡寺制之所宜有者燦然畢備又置僧田三十餘畝功成而師亦老矣余自有識以來閭里之閒但見邨落日消一日今之犁鋤所及者皆昔之井竈也至於僧居屈竹道傍未幾而環堵矣未幾而檳榔矣汙邪市井未嘗擇地塵坳滿室但供邨婦里老之遊息頃余修志僧會司上冊餘姚一邑之內菴院凡一千三百有奇而古刹如明真正覺蓮峯明因慶善等皆廢爲荒隴卽如武林之辯才龍井烏窠孤山皆非故所奇

地湮沒不知凡幾然則私創之盛古刹之衰也每見古德於名賢過化之跡必極力護持真淨之青松社惠勤之六一泉皆是也天地閒清淑之氣山水文章交光互映雪泥鴻爪不與劫灰俱盡耳今德如莊嚴名勝且欲考水竹居二蘭齋歸菴一一復其故處亦可謂之不俗矣顧德如尚以參學未究爲歎余以爲使德如而盡參學之願不過一杖一拂夫一杖一拂之與一椽一瓦皆非佛法誠能護持名蹟焉知不有如正宗仲猷其人者將來似續於此乎余每過寺念泰定閒先州判茂卿先生於此置田講學徘徊久之德如因求記以垂永遠年來求文者不能悉應顧余女徽音居鄰其地數以爲請余老矣學殖荒落尙恐收拾不盡也

小園記

黃竹浦軒之西有隙地縱二尋而強橫三尋而弱辟以爲園用樹花木不過八九株而已因買瓦盆百餘以植草花水僊艾人芳洲洛陽茉莉真珠烟蒲石竹辣茄苦蕒金燈銀合黑牛紫燕虎刺蛇牀鈴兒鼓子忘憂含笑庭莎路杞秋羅

似翦荷包象形康成書帶徐公劍脊濃則牡丹芍藥淡則春蘭秋菊藥品瑣碎皆爲芳草施以人工則桃李梅杏金松線柏屈其干霄之姿下同弱卉至於麗春款冬丈紅段錦鴈來燕麥紫茱秋棠斷腸洗手紅姑虞美叢生砌下遞換隣閒非盆盎之所收拾也昔黃石齋先生爲先忠端公書庾子山小園賦遂取揭之軒中而以名園夫子山之園雖小猶得畝側八九丈縱橫數十步以吾園較之不能十之一無乃非其類乎雖然小大何常之有子山之園視章華銅雀謝靈運之山居沈約之郊居千百中不及一二故謂之小而吾之園又不及子山因子山之小而小之昔傅長虞小語賦糠粒爲舟針孔自匿蘇子美詩托身螟兩睫卜都牛一毛是萬物之數尤有小於吾園者矣郭象曰統大小者無小無大者也苟有乎大小則雖大鵬之與斥鷃宰官之與御風同爲累物耳試爲之拔棘排牆藍水東流戴九靈痛哭之詩蹟也石窗南峙劉綱樊夫人乘雲而狡獪者也西望則虞仲翔注易之露未乾北眺則陸放翁之奇峯突兀此則子山之所不能有也今人之譎固陋者曰兔園策兔園策乃徐庾之體非鄙朴之談

但家藏一本人多賤之兔園者小園也天下之固陋有如余者乎則余之名此園也固宜

答萬貞一論明史曆志書

承寄曆志傳監修總裁三先生之命令某刪定某雖非耑門而古松流水布算
簌簌頗知其崖略今觀曆志前卷曆議皆本之列朝實錄崇禎朝則本之治曆
緣起其後則三曆成法雖無所發明而採取簡要非志伊不能也然崇禎曆書
大概本之回回曆當時徐文定亦言西洋之法青出於藍冰寒於水未嘗竟抹
回回法也顧緯法雖存絕無論說一時詞臣曆師無能用彼之法參入大統會
通歸一及崇禎曆書既出則又盡翻其說收爲己用將原書置之不道作者譯
者之苦心能無沈屈某故以說四篇冠於其端有明曆學亡於曆官顧士大夫
有深明其說者不特童軒邢雲路爲然有宋名臣多不識曆法朱子與蔡季通
極喜數學乃其所言者影響之理不可施之實用康節作皇極書死板排定亦
是緯書末流祇有一沈括號爲博洽而春秋日食三十六又爲衛樸所欺有明

真度越之矣某故於曆議之後補此一段似亦不可少也來書謂去其繁冗者正其謬誤者某之所補似更繁冗顧關係一代之制作不得以繁冗而避之也以此方之前代可以無愧然前代顧亦有未盡善者前代曆志雖有推法而立成不能盡載推法將焉用之如元之授時當載其作法根本令後人尋繹端緒無所藉於立成始爲完書顧乃不然讀其曆志又須尋其端門之書而後能知曆是則曆志無當於曆也崇禎曆書所列恆年表周歲平行表之類猶之未來曆也其推交食有太陰距度表黃道九十度表太陽距赤道表視半徑表南北高弧表視差表時氣簡法表太陰實行表食分表蓋作者之精神盡在於表使推者易於爲力今既不可盡載而徒列推法是則終於牆面而已某意欲將作表之法載於志中使推者不必見表而自能成表則尤爲盡善也顧某衰病舊學荒落又加以來期迫切無以慰三先生下問之意心竊愧焉

南雷文定後集卷二

餘姚 黃宗羲 太沖撰

碩膚孫公墓誌銘

順治丙戌六月二十四日孫公碩膚卒于海外之滄洲滄洲尋爲界外殊絕內地康熙乙丑還滄洲于定海其孫訥渡海載公柩歸葬燭湖蓋公墓之不作寒食者四十年矣余與公共事時膂力方剛令癘殘頑鄙不死始得銘公之墓公諱嘉績字碩膚燭湖先生孫應時之後五世祖燧巡撫江西右都御史死宸濠之難諡忠烈高祖墀尙寶司卿曾祖□上林苑監丞祖如游文淵閣大學士諡文恭父□工部郎中妣胡氏屠氏俱封太淑人公刻苦爲學業舉子以才稱登崇禎丁丑進士第授南京工部主事時徐忠襄爲應天府丞爲公分別邪正開張聞見公從捧手而受之本兵聞其名調爲職方司郎中適有風塵之警傅城閉壘皆不測其進止公曰此不難知當俟後隊南下耳旣而果然高奄起潛求世廢公覆疏格之起潛恨甚烈廟于觀德殿較閱軍器讒之下獄會石齋先生

逮入上怒其面折意欲殺之廷杖而入獄門襍被藥裹一切撫攔公徹已服用
遇之甚謹稍閒從而受易凡與先生通往來者楊嗣昌皆指之爲福黨因取同
獄黃文煥文震亨等及公雜治之多睚眦戟手以分涇渭公獨曰昔黃霸之在
獄受經于夏侯勝史傳以爲美談今又何必諱乎同事者皆愧其言清獄詔下
司寇徐忠襄遂出公踰年起爲九江道僉事未上而國變乙酉大兵東渡郡邑
望風迎附然數百年故國一旦忽焉當是時人心恒擾未定但觀望未敢先發
公方買書築室欲老泉石而書卷橫胸利害智力倉卒不暇較量閏六月九日
於空然無恃之中創爲卽墨之守黃鐘孤管遂移氣運東浙因之立國二年顧
不可謂無益興亡之數血路心城豈論修短陳壽卽仇諸葛不能不紀蜀漢宏
範雖逼崖山未嘗不稱二王從來亡社雖加一日亦關國脈此說蓋在成敗利
鈍之外者也當公丁丑赴試縣令梁佳植夢公廷對第一榜發不驗及卒滄洲
適葬張信墓道之南信固明初之第一也前定之矣東浙歷官左僉都御史東
閣大學士公生萬曆甲辰九月十四日配陳氏封夫人子延齡中書舍人從亡

海外歷官司農孫男六人訥州同知訓諤諸生誠諡詮孫女幾人其一嫁太學生黃正誼卽余子也公詩法孟王其文集散失止存數十首此外則五世傳贊存直錄銘曰

越唯忠烈抗節武廟嘉靖名臣文恪爲邵萬曆三宰正色清簡光熹之際文恭是顯大廈已傾一木血指明之世臣嗚呼孫氏

謝時符先生墓誌銘

君諱泰階字時符謝氏爲定海盛門其先系出平江宋建炎進士守知定海因家焉五傳爲元至正閒高安令嗣謙又五傳爲明福建僉事琛琛弟璵生廷華廷華生贈參政維甯維甯生贈參政大綸大綸生四川按察使渭則君之父也母張淑人夢垣星入懷而生君君生而穎異強記絕人從按察使公於京邸朝士往還便能揖讓應對於其閒背誦所常課書娛情談笑見者無不奇之弱冠舉童子試第一已而按察公入蜀君家居讀書一日見孤鶴集於塔頂蔓聲天末君不覺淚下如雨亦不自知其何心也未幾按察訃聞人以爲孝感所致三

年丙舍詠世德之駿烈誦先人之清芬固爲謝氏之家史矣君方架學區中斟酌當世王路非遙而金衡委御玉斗宵亡君遂滅影桂庭躬耕於柴樓之野雲闕徐闇公張子退避地海濱與柴樓左近款狎相過抵掌指畫繼之以章皇痛哭樵牧見之不知此數人者一日而哀樂屢變也當是時兵戈銷鑠斗米三百錢流寓羸露君節縮擔石與之公其饑飽蓋有王英孫主唐林義士之風焉亡何而燼黨阻山野無甯處闇公從亡君亦徙居郡城甬之名士萬泰董守諭董德偁董德偕皆新當失職以耿介自置得君而喜甚聽兩之夕聯句之章未嘗不與偕焉丁亥冬滄師闖入甬之好事者多死君之友范兆芝爲所連染君脫之於劍鏗以爲君之才固無所不可也君雖不爲世用而燃脂瞑寫弄墨晨書藏之縑表不以示人臨卒悉括所著譔火之語其子曰吾寄身弋釣無關天壤紙筆遂多苟不化爲煙雲恐作災祥耳嗟乎亡國之戚何代無之使過宗周而不憫黍離陟北山而不憂父母感陰雨而不念故夫聞山陽笛而不懷舊友是無人心矣故遺民者天地之元氣也然士各有分朝不坐宴不與士之分亦止

於不仕而已所稱宋遺民如王炎午者嘗上書速文丞相之死而已亦未嘗廢當世之務是故種瓜賣卜呼天搶地縱酒祈死穴垣通飲饌者皆過而失中者也君之所處爲得中矣或者以君之焚書爲惜夫鄭思肖之心史鐵函封固沈之井中是時思肖年四十三耳至七十八歲而卒當其沈之之時與君火之之時其心一也蓋皆付之烏有耳思肖豈望三百五十六年之後其書復出而行於世乎心史斷手其餘年三十有五亦不聞別有著撰也自有宇宙祇此忠義之心維持不墜但令淒楚蘊結一往不解原不必以有字無字爲成虧耳君之子孫可置無悲君生於萬曆丁未三月六日卒於順治庚寅二月十日娶劉氏投畚偕隱宗黨賢之其生也後君一年正月十日其卒也後君十一年正月十一日合葬于邑之樂家樓山子四人長歸昌歷知固始碭山德化三縣次熾昌次禹昌皆諸生次殷昌壬子舉人孫六人緒遠緒進緒述緒遴緒選緒育孫女七人曾孫二人初君爲熾昌聘渝州張氏女魯王次渝州道閉不通君夢張女納於王宮覺而記其事登候濤山焚之及渝州破君已棄世熾昌亦改聘歸昌

渡海諏張女存亡張女無恙異時張父欲納之王相國張公不可而止始知君
夢之爲冥契也相國所居雪交亭與張氏鄰相國殉節亭下從死者骸骨相撐
拄歸昌拮據置大甕中埋之立石書張相國墓歸而告於君廟所以承君之志
也乙丑正月歸昌命緒遠來乞銘八月余自吳門返吾友萬斯選又書來速乃
銘曰
採藥何許候潮山蠹日之出兮以晞吾髮日之沒兮以寄吾哭前有謝翱君固
其族闐闐隱隱終古如昨水耶哭耶問諸海若

朱止谿先生墓誌銘

先生諱嘉徵字岷左號止谿爲朱文公十六世孫鉉仕兩浙通判卜居武林其
子澆又遷海寧遂爲海寧人曾祖高明知縣浙祖國柱父贈推官學禮先生受
學於老儒鍾鴻穎已與曹吏部元方讀書靈隱山者十年先生故多病厲志爲
學而不知病之去體也是時坊社最盛而先生主持其閒捧銅槃而授指者徧
於三吳崇禎壬午舉於鄉明年會試中副榜兩都尋沒先生亦無意於功名而

名高爲累學使者檄署會稽學教諭亡何徵書除四川敘州府推官兵火之後城隍半墮官廨俱淪瓦礫令其家僮伐木轉石編茅爲屋與居民雜處一切以安靜治之草寇竊發酌定團練機宜控扼要害撫勦兼用擒賊首吳天民平白應龍之亂督撫以此能之時居民離散一城不過十數戶先生一意招來從四圍回者一百二十戶從烏蒙回者一千三百五十三戶又贖難民一十六戶于是川中稍稍有足音矣明末推官新安洪某死于亂兵其子起三十年奔喪莫知其處先生爲之訪問故老得之城南七里山麓資其萋斐以行宜賓俞令仁和人死已二十餘年其子俞綱萬里尋親先生哀之有言其初亂時入烏蒙後不復見先生移文遣手力導綱至烏蒙函骨以出脫驂歸葬慶符邑紳何源爲川南富室邑令交結於源甚厚土寇縛令以去令得逸求源贖其妻子源贖之歸令反以此謂源通賊揭之巡撫先生忿然不平見巡撫頌其冤源始得雪蓋先生守其初志終不敢以政事自見激發宦情而惻隱之心隨地湧出人亦莫得而掩也方先生初至僚友燕集卽問杜工部草堂安在明日往遊中有故友

正告曰足下書生夫吏有吏之事何及此爲少頃言及風土先生不禁憮然曰僕從川北來川西經途千里青燐白骨纍纍出草閒非復人世所聞見我輩莅茲土者作何生聚故友笑曰正恐自顧有勿暇耳人莫不笑先生之迂不知先生鴻冥之志方笑其褊褊耳在官六年乃自免歸先生喟然嘆曰茲行亦自不惡其入蜀也過潼關望嵩華攀老子繫牛之樹其出蜀也灑灑馬脊巫峽猿聲無非奇地但恨奚囊收拾不盡耳歸來以著書爲事取漢魏六朝三唐樂府詩集審聲辨體樂府以風雅頌分之詩以興比賦通之倣卜子夏詩序例明其大旨以示勸懲題曰廣序復選兩漢至明凡二十二代之詔令奏疏彙爲一集曰經世書昔文中子續六經而今亡矣先生所著卽續詩續書之意也花晨月夕吟詠閒作而天復假之以一子三孫一媳一孫女皆能詩故先生偶唱一章閒門而和者便有六人菽苑以之爲美談當事求詩文者無虛日先生亦不苟作唯一應縣志之請浙江通志則不赴也所著有止谿文集二十卷詩集三十卷道遊堂詩集四卷川南紀游詩八卷樂府詩集廣序一百卷古詩系十卷經世

書一百六十卷生於萬曆壬寅正月初五日卒於康熙甲子二月十八日年八十三配吳氏孺人子一人爾邁太學生孫四人曰灝曰淳曰治皆太學生曰濬孫女三人長芬適諸生蔣世昌餘在室曾孫五人桓楸模棫樸余自丙辰得交先生翦燭論文亦且五年而先生每歉然不自得夫先生隱約前朝際此亨運亦稍稍有以及物乃若多此一出者豈亦魯齋不欲立碑之意歟爾邁於古文辭有名求余銘先生幽石予不敢不信也銘曰

鏡湖詩酒蜀中金石風流蘊藉止谿宦蹟續詩續書河汾彷彿白首青燈窮年兀兀源遠流長文公之澤代惟十六居鄰海若康流經術止谿文業

鄧起西墓誌銘

君名大臨字起西別號丹邱常熟人鄧黻曾孫黻舉於鄉以母老不上春官及母沒服闋黻仍不上曰吾向以母在不往今往是利母之歿也時稱爲真孝廉起西幼孤稍長卽能力學從遊於江陰黃介子繇祺歲乙酉江陰城守不下介子與其門人起兵竹塘應之起西募兵於崇明事敗介子亡命淮南以官印印

所往來書爲人告變捕入金陵獄起西職納橐籥獄急介子以其所著小遊仙詩園中草授起西坐脫而去當事戮其尸起西號泣守喪鋒刃之中贖其首聯之於頸棺殮送歸有漢楊匡之風當時稱介子之門有徐趨鄧大臨趨則抗節而死者也起西師死之後遍走江湖欲得奇才劍客而友之卒無所遇遂侘傺而死聞者傷之當辛丑余讀書雙瀑院起西來訪雙瀑萬山之中人跡殆絕起西何以知之問其所自曰甬東視其所肩之行橐纍纍有道士印數十顆曰吾已竄身爲黃冠矣唱和旬日與之偕至武林起西上玉皇山去甲辰余至虞山起西以其精舍館我款對數人張雪崖顧石賓皆其道侶也隨訪熊魚山於烏目訪李膚公於赤岸皆起西導之比余返棹起西送至城西楊忠烈祠下涕零如雨余舟中遙望不可爲懷然不意其從此不再見也嗟乎桑海之交士之不得志於時者往往逃之二氏此如縛虎之急勢不得不迸裂而倒行逆施顧今之逃於釋氏者鐘鼓杖拂投身濃豔之火是虎而就人之豢其威盡喪起西之在元門苦身持力無異於全真之教有死之心無生之氣以保此悲天憫人之

故我無愧師門卽鄧牧張兩亦不願爲是谷音中人物然而世眼易欺禪師語錄流通頗不寂寞世無杜清碧起西名氏已自銷沈乙丑余過崑山顧景范以所作鄧丹邱傳屬余誌之當今日而有舉及起西者恐此外更無人矣銘曰
門生守喪不避犴狴東漢以來此風如洗誰其嗣之黃門高弟防風一節足概全體

顧麟士先生墓誌銘

科舉之學限以一先生之言此如詩之有律詞曲之有九宮詩雖不盡於律而非律則不名唐詩九宮卽未必降鬼神而非九宮則無以諧聲故字而析之不厭其離也比而同之不厭其複也顧名一門粥粥然循牆而走信傳過於信經所謂有司之尺度也顧昧者欲劑量他儒之說以入之排異而不安不知書院場屋之學各自有溝澮耳數百年以來推明其義者大全以外蔡虛齋之蒙引陳紫峯之淺說林次崖之存疑其書獨傳以其牛毛繭絲於朱子之所有者無餘蘊所無者無僂人也然而各自成書意或駢拇辭或枝指又百年而麟士先

生者出融會諸書削其繁蕪抉其隱伏名之曰說約自說約出而諸書俱廢博
士倚席而講諸生帖坐而聽者皆先生之說也當是時海內有文名之士皆思
立功於時藝張天如以註疏楊維斗以王唐艾千子以歐曾僅風尙一時惟先
生之傳久而不衰奈何世不說學摘先生之書存其二三仍以先生之名書者
附註四書之上此如推曆者不通算學而以歌括定分至閏朔耳家有其書人
習其傳竟不知此外更有何物不特經史之學亡而先生之學亦亡矣先生姓
顧氏諱夢麟麟士其字也別號織簾太倉之雙鳳里人吳丞相醴陵肅侯雍之
後醴陵三十九世孫昌始遷雙鳳又二世從龍爲先生之父母陳氏夢石麟而
生故以爲名少爲諸生以高第廩於學校中崇禎癸酉副榜援例入太學辟舉
令下巡撫張國維欲以先生應詔先生力辭之集三吳名士與楊子嘗爲應社
其文雅馴爲時所宗是時坊社最盛而名於天下者復社幾社與應社而已巡
按祁彪佳兵備宋繼登凌義渠咸以賓禮待先生方岳貢守松郡屢欲招致一
見不可得及奉嚴旨始往送之明州錢肅樂來守太倉造廬相款遣子弟受業

然先生未嘗有所干請也桑海以後斷跡城市客授汲古毛氏與孝廉陳瑚舉白鹿洞規行之曉筆暮詩一寫性真不假粉墨最其平生所著四書說約二十卷詩經說約二十八卷四書十一經通考二十卷織簾居文集四卷詩集四卷譚藝錄二卷中庵瑣錄一卷雙鳳里志八卷生於萬曆乙酉三月十三日卒於順治癸巳十一月二十日年六十九又七年葬於吳塘之原子一人諸生湄其詩文皆稱於世癸亥歲余在武林湄以所作行略丐余爲誌遲之二年余雖衰病不敢負此一諾也銘曰

六經之垂如侯之布射者千夫聽其自遇降而場屋衆矢俱措累黍一家其書無數離多合少等於烟霧以形取影虛齋之註而陳而林共飲法乳約說後起經生寶庫垂髻粉子亦知楊顧制科不改辦香同炷

顧玉書墓誌銘

天啓時逆奄暗干閭位翦除社稷之臣乙丑六人丙寅七人烈皇登極其孤子皆訟冤闕下敘其爵里年齒爲同難錄甲乙相傳爲兄弟所以通知兩父之志

不比同年生之萍梗相值也然余家東浙俄逢喪亂戢翼榛梗四方之音塵殆絕歲甲辰始至姑蘇與周氏兄弟悽愴話舊尋至虞山顧玉書來會訪李膺公於江陰之赤岸不遇丙辰余在海昌寓書於吳江周長生當年同集闕下初離外傳遇事周章長生爲之提揭欽愛之情至今歷然長生旋即謝世然猶及見此書壬戌魏州來求其父翰林子一誌銘余因發其沈屈四月周子佩來拜先忠端公墓八十老人千里命駕閭里以爲祥怪乙丑余汎吳舫遂主周氏而周氏子弟多才殆逼前良於其座上見顧宗俊者爲玉書之子流落可念且以其父墓誌銘爲請玉書名麟生世爲常熟人父大章陝西副使謚裕愍妣蔣氏封安人玉書志氣豪邁好讀書年十五裕愍遭逆奄之禍及烈廟昭雪死事而裕愍以封疆一案爲逆黨把持止於贈官玉書赴闕頌冤天子詔法司改定爰書宜興者裕愍之門人其再相也玉書入其幕中起廢蠲逋清獄薄賦四事玉書頗與聞之虞山故與宜興涿鹿善宜興心欲起涿鹿而衆論不同姑徐之以觀其變虞山遂致書宜興云閣下含宏光大致精識微具司馬公之誠一寇萊公

之剛斷而濟之以王文正之安和韓魏公之宏博目今起廢爲朝政第一至如
涿鹿餘不具論當年守涿之功屹然爲畿內保障豈可一旦抹撥尙浮沈啓事
乎往見子丑之際持局者過於矜愼流爲敬側一往不返激成橫流此正今日
之前車也玉書見之訝其翻逆案也年少氣盛不顧利害以其書洩之於外舉
朝大譁虞山聞而恨之後十年玉書有家難虞山不能忘情幾置之死因徙居
吳門家世膏粱驟承貧薄玉書不以芥意惟言有兩恨事苟得暴白卽死亦無
憾其一魏子一當國變之日語所知曰吾不難一死然不爲徒死逡巡僞命約
唐通赴難而身任內應某日以草場舉火爲驗通爲子一心交也三遣人而通
不報知事無成始作絕命詞投繯而死今不原本末而置之六等之列寃矣其
一逆案楊維垣宏光時納貨至巨萬大兵至貨重不得行乃市三棺中書爲己
樞旁二樞殺妾以實之夜半負重出城爲劫者所殺南都父老歷歷能道之無
知者目爲死事維垣一生狡獪猶得行之死後寃矣嘗致書如皋冒辟疆諄諄
辯之嗟乎玉書可謂不忘其父者也詩文有進履齋詹草娶葛氏河南按察使

魯生女子宗昌宗隆宗元宗達宗俊壻趙延史戴泌錢祖熙陳國鼎蔣汝楫陸孫繩李琪芳周旦齡王文南皆諸生旦齡卽周忠介公之孫也銘曰

壬午之冬余與玉書同出燕京童清馬閑顧盼生姿王國之楨曾未幾何憔悴江湖紅米折鐺虞山之陽短碑數尺不平者鳴

參議閻公神道碑

公諱世科字伯登別號礧礎其先太原人至公之祖雙溪徙於淮右雙溪四子而覺吾以明經爲上猶掌故惠吾以舉人爲狄道令公則覺吾之長子也登萬曆甲辰進士第授湖州府推官湖濱巨浸多盜賊治以嚴苛始辦故一案之中破壞每至十數家公奉職循理解其繁密民甚便之有豪右誣人死罪公疑之精神所注通於夢覺神語諄諄卽時判結戊申水災民死者過半公與郡守陳幼學發廩勸分盡所以救荒之術故民雖饑而不怨湖多秀民而經術不足公禮姚承庵以爲太師其說時與朱文公相出入學者始知穿穴經旨以求自得是時郡守治尙威嚴而公濟之以寬故兩人深相得郡以大治行部至蕭山其

縣有盜藪經百年無發覺者公荒閱而得之紹興庫藏爲胥吏乾沒者盈萬會稽以還原額嘗攝歸安羨金二百用助橋工曰此雖不足損吾清節但恥見作凡人耳庚戌大計郡吏舉卓異第一入爲戶部主事癸丑以本部郎中總理遼餉時邊烽尙熾而軍政闕茸公盡然憂之疏言今邊境偷安已久伏莽一發必不可支宰賽擾於河東擺要擾於河西而虎慙乘機挾賞畜禍更深京民二運十缺八九沙中偶語漸成脫巾懇罔寺水衡兼派以濟庶幾銷患未然廟堂見之亦心動公乃蒐乘補伍廉重核實三年之內捐公費千五百金貯積六萬餘緡發寄囤之弊坐放如期築倉廩數十閒分屯鹽二項不相侵奪公於邊事所以經營綏輯先後始終之際委曲纖悉無不備者蓋已逆知將來東方之有事也丙辰擢守開封司農李汝華特疏題留引公自助又明年陞山東右參議兼按察司僉事廷議邊才改爲寧前兵備當是時戊午之敗問尋至公置幼子於潞河單騎出關拔祖帥於廢籍整頓營壘以待不虞而巡撫不知其爲勞薪也以公禮格之公旣不得行其志念八十老父曳杖倚閭將無忠孝兩失乎遂投

板棄官而去自公去後疆場破碎談兵者非身橫獄戶卽駢首西市鮮有以功名終者而後知公有先幾之智也當登萊之變閻爾梅以之間公公曰此疥癬疾耳邊塵孔棘朝士樹黨書生不知兵而授之兵權用違其才是則可憂也爾梅曰公向在寧前何不極言其弊顧投効歸耶退則勇矣如報國何公曰報國非可託之空言用人者當知人用於人者當自知力餘於任任乃得勝夫遼左用兵之地也今不論其知兵與否而授之兵彼又不自知其不知兵而妄謂能兵趙括陸機之禍種種矣吾亦非知兵者欲報國而辱國故不如投効之爲愈也敢言勇退哉爾梅曰今天下固無知兵者苟有之功可得成否公曰吾不敢謂其功必不成也然而實難樹黨堅則掣肘衆雖有其人誰能始終之魏相信營平者少秦檜忌忠武者多也觀於此言不特公之自知甚審而於國家敗亡之勢如燭照而數計也彼諸葛武侯非知兵者乎陳壽謂其理民之幹優於將略梁益之民咨述武侯者如甘棠之詠召公鄭人之歌子產亦不過循吏規模耳夫武侯豈欲以知兵顯哉不幸而遇蜀主架累驅之從事於鋒鏑非其本色

況於無蜀主之知者乎則公之不以知兵自許使後之人傳之爲循吏又何愧焉公歸整拂藤蒲具陳花水與太翁得盡田里骨肉之歡逮丁大故雞骨支牀爲鄉論所榮逆黨崔呈秀盛時以同年生通殷勤公不顧而唾家居二十五年漕撫王紀李養正給事中解學龍御史王允成累登啓事公皆不應所著有敬刑計遼始末諸書生於隆慶庚午六月二十一日卒於崇禎壬午二月二十一日享年七十三葬於淮上之蛟龍溝北壟娶高氏蔡氏贈封皆孺人副室陳氏子一修齡江以北之學者也女三其壻諸生許永祜舉人李藻先諸生杜嗣皋孫幾人修齡不遠二千里介吾門顧諟以公神道碑銘爲請余衰病學落豈足以知公欲辭之而難於往返因勉書其崖略銘曰

神廟之際物大容姦猶如果蔬蟲穴其閒巖關奕奕羣偷囊橐唯公隱憂數年禍作公之重來莫可措手前讒後賊又掣其肘險之在前易道丁甯初需於郊不犯難行凡公之言契終論始卽謂知兵亦莫過此

